

li. P.
...
...
...
...

25

FASCICULUS

DEVOTIONIS

Ad Salvatorem Mundi.

à Sancto Damaso, Pontifice Maximo,

Primum Stylô Ligatô,

EXCITATUS,

Nunc, verò Solutô In orationum formu-

las paulò longius,

DEDUCTUS,

ac sub auspicijs

Illustissimi & Excellmi DOMINI

D. ADAMI

Comitis de Tęczyn & Czekarzewice

TARŁO

PALATINI Lublinensis;

PRÆFECTI Iasensis, Drohobyensis, Złotoriensis,

Zwolinensis, Dolinensis. &c.

Pijs JESU CHRISTI Cultoribus,

OBLATUS.

Imprimis Tempore Communionis

Usui futurus O-V-25

Cum *Permiffu* Superiorum.

—————
VARSAVIÆ

Typis S.R.M. Scholarum Piarum Anno D. 1736.

In Avitū Vetusſiſſimū Do-
mūs *ILLUSTRISSIMÆ*
DECUS.



Aſia Romanos olim præbat honores,

Conſulibus ſummum conciliando Decus.

Nunc quoq; Sarmaticas implet ſignatque curules

Quâ nil nobilius Lechicus Orbis habet.

Et præcat feſtis ad laticlavia pompis,

Faſciculus magnis faſcibus omen erit.



DEDICATIO.

Quo majorē fructum in-
Pijs Christo excitē Cul-
toribus, Fasciculū hunc
Devotionis Tibi of-
fero. **ILLUSTRISIME &
EXCELLENTISIME DO-
MINE.** Meritò ad manus Tu-
as repono ejusmodi preces,
quas Tu pridem affectuoso erga
Deum in pectore, propenso erga
(2) Caelos

Cœlos in animo conclusisti. Nec
enim Te publica circa universa-
le bonum Regni negotia à singulari
Officio distinent pietatis, æstus cu-
rarum pro Republica non extin-
guunt devotionis ardorem, Illustri-
ssimis Palatinatûs titulis serena-
tus in Te Honor virtutum non
modò patitur lumina, sed adauget.
Imò si hæc alibi longis inter se di-
scernuntur intervallis, circa omne
discrimen pariter in te corriuan-
tur. Impendis vitam Patriæ, Cæ-
lo animam, totum Te immolas
Superis, non dees Reipublicæ, quã
estò integram posses ex æquo mo-
derari. Non ignoramus Te im-
maturum annis, sed adultum
virtu-

virtutibus, maturrimum re-
degestis veneramur. Priscam
veterum Sarmatarum indo-
lem in Te demonstras, quem
non ut Ascanium Æneas &
Avunculus Hector excitant, sed
illi Gloriosissimæ Genesis Majores,
qui olim cum Lecho prima Po-
loniæ ponebant fundamenta, inter
Duodecem Palatinos non postre-
mi numerabantur. Debeant alij
originem Domûs suæ Regnis, &
Regibus, Lechia magna ex par-
te Tartonibus prima sui ad-
scribit initia. Ad fulgorem
Gentilis Ascie Polo propior re-
splendet Polonia, latebras quæ-
runt hostes, si hæc in Gradivi

emicat Campo. Componant alia
Illustrissima Prosapiarum Deco-
ra, ceu firmiores Columnæ basili-
cam ædem Rempubicam, Ascia
hæc Architecta est laboris univer-
si. Digna antiquitus in Ausonijs
locari Adytis, nunc orthodoxo ri-
tu per Ecclesias in tot Præsulibus
coli, Senatorias per Curules cir-
cumferri. Ut & Tu Regiam Se-
natûs intrares, illa portam pan-
dit. Necesse alios ante Purpuras
canescere, Tibi ætas hæc favora-
bilem addidit calculum, in qua
non pridem gloriosis pro Patria
Functionibus, edecumata benege-
storum praxi, non tam dierum
quàm meritorum plenissimus Ne-
stor

stor apparuisti. Quot pericula
vitæ volupe Tibi erat subire, ut
secura esset Patria, hæreditariæ
sortis pati dispendia, ut Boni pu-
blici, fortuna maneret in integro,
sub explicatis in puro Iove ten-
torijs vigilias agere, ut aliquam
Regno reduceres quietem. Inge-
neratus heroico Tuo pectori belli
ardor, adversarios ignes longè
exsuperavit, Tibi immortalem
Nominis accendit famam. Au-
dies futuris ætatibus ex illa ma-
gnanimitate, quæ in Scipiadis
& Camillis desideraretur, ex il-
la in Tribunalibus nuper demon-
strata Sententiarum gravitate,
quam adhuc optaret Aristides,
ex illo

ex illo in Publicis Functionibus
verborum pondere, quo Tullius
hucusq; celebratur. Et jam Te hinc
Amor Civium, quē tu præripuisti,
hinc egregiarum qualitatū co-
mitatus commendant plurimum.
Palatinæ admotus Curuli brevi
ascensurus majora subsellia, Du-
ctor non pridem Copiarum, brevi
Ducum Clavas manu prehensu-
rus. Uberrimam ego procul du-
bio Devotionis messem spero alijs
colligendam ex hoc Fasciculo, si
illum primò Tuis manibus inges-
sero. Plurima hic videre est Sal-
vatoris Nomina, tum ex digni-
tate Dei Hominis, tum ex obli-
gatione Creaturæ, quæ non una de
ratio-

ratione refertur ad eundem. Ita
quæ eminent, compellationibus
etiam abundant. Idem pelagus
totum alluit Orbem, tamen va-
riè diversis in partibus nuncup-
tur. Sol unicus est, tamen semel
à signis Zodiaci, alias ab Ortus,
& Occasu sua derivat Nomina.
Non carent mysterio quælibet
Nomina sacris in literis Christo
apposita, distinxi eadem in singu-
las Orationes; ut eò facilius de-
votus Lector ad vota sua incli-
net Deum Hominem, quo fre-
quentius eum appellaverit. Dum
verò sub Auspicijs Tuis Salvato-
ris repono cultum, id perpetuum
apud me votum est: ut Cælos Ti-
bi in-

*bi inclines ad nutus, vitam si
non immortalem ut Superi, di-
uturnam saltem ducas; præludat
autem hic Fasciculus, Maximis
Honorum Fascibus.*

Quod precatur

JLLUSTRISSIMÆ ET EX-
CELLENTISSIMÆ DOMINA-
TIONI VESTRÆ.

Servus Devotissimus
Carolus Posadowski de Habdanck.

DE COGNOMENTIS
SALVATORIS

*à Sancto Damaso, in versus
coactis.*

SPes, Via, Vita, Salus, Ra-
tio Sapientia Lumen,
Judex, Porta, Gigas, Rex,
Gemma, Propheta, Sacer-
dos.

Messias, Zebaoth, Rabbi,
Sponsus, Mediator.

Virga, Columna, Manus,
Petra, Filius, Emanuelq;
Vinea, Pastor, Ovis, Pax,
Radix. Vitis, Oliva,
Fons,

Fons, Paries, Agnus, Vi-
tulus, Leo, Propitiator,
Verbum, Homo, Rete, La-
pis, Domus, Omnia Chri-
stus, JESUS.

*Vide Bibliothecæ magnæ
veterum Patrum & anti-
quorum Ecclesiasticorum scri-
ptorum Thomum quartum,
qui continet scriptores sæcu-
li quarti id est ab anno Chri-
sti Trecentesimo usq; ad Qua-
dringentesimū Editionis Co-
lonensis. 1618.*


S. Hie-

*S. Hieronimus, in Catha-
logo Scriptorum Ecclesiasti-
corum.*


*Damasus Romanæ Urbis
Episcopus in versibus compo-
nendis ingenium habuit, mul-
taq; & brevia metro edidit &
prope Octogenariis sub Theo-
dosio Principe mortuus est.*

Ad LECTOREM.

Paucis Te monitum velim Pie lector,
preces hoc libello contentas si non
majori, magna saltē ex parte desumptas
esse ex verbis Sacrae Scripturae, quae Spi-
ritus & vita sunt; ut vel hinc dum eas
peragis, ad majorē fiduciam animeris, Qui
enim Orationē suā ad Deū ex ipso Dei
verbo instituit, linguā utitur magis Deo
Familiari & accepta. Hæc quidē mundi
sapientibus est ignota, & in verbis etiā
quibusdā videtur barbara; sed Christia-
norum sapientia est de Porticu Salomo-
nis, agit S. Hieronymus, nō de Rostris
Tullij, cui hoc ipsum nomen Salvator,
ut de alijs S. Scripturae verbis taceā bar-
barū videtur fuisse; hinc judicabat ora-
tione quarta actionis secundæ in Verrē
eum, qui salutem dedit, uno latino no-
mine non posse exprimi, & Soterē ex
Græco idiomate nominavit. Sed his
parū moramur: cū ad finem nostrū
maximē serviant illi sensus, & verba,
quæ S. Scripturae & Ecclesiae usitata
sunt, & magis orantium animos ad Pie-
tatem, & profectum S. Spiritus possunt
excitare: id quod futurum spero & de-
sidero.



S P E S.



Alvator mundi! fons
 omnis gratiæ, & sa-
 lutis, in Te confidit
 anima mea: Es enim
 auxiliator meus potentissimus,
 & fidelissimus remunerator,
 tam bonus insuper & miseri-
 cors: ut non solum omnia bo-
 na tua; sed Te ipsum etiam mi-
 hi promittas; Et ideo es hære-
 ditas mihi præclara, & mer-
 ces mea magna nimis, quam

A

cer



certissimè spero, confisus tuis
promissis, meritis, & gratijs.
Et in hac confidentia accedo
ad thronum Clementiæ Tuæ &
prosterno coram te preces me-
as, non in iustificationibus me
is; sed in miserationibus tuis
multis. Fateor quidem, pro-
pter malitiam, & ingratitude-
nem meam poenâ sum dignior,
quàm beneficiô; Spero nihilo-
minus omnium peccatorû me-
orum veniam, auxilium gratiæ
tuæ usq; ad finem, & vitam æ-
ternam; & hanc præsertim,
quoties ad communionem ac-
cedo, secundum promissionem
tuam Joan. 6. Qui manducat
hunc

hunc panem, vivet in æternū.
 Reposita est hæc spes in sinu
 meo. Fiat quæso panis ille
 divinus pingvis refectio spi-
 ritūs mei; antidotum, quō
 præservet á malis, nutrimen-
 tum, quō crescā in bonis, ro-
 bur & vigor, gaudium & sola-
 tium cordis mei, & in morte
 viaticū meum: cum illo enim
 velut certissimo pignore salu-
 tis meæ coram te iudice meo
 comparere desidero. Pudet in-
 terim & pœnitet, non habuisse
 me eam spem & fiduciā, quam
 tua bonitas mi JESU! meretur,
 & egestas mea postulat. Tu
 es, & manebis spes maxima sa-

lutis meæ: nullus enim speravit in Domino, & confusus est. Proinde & ego spero me nunquam à te mi Deus deferendū esse. Hanc spem meam, bone JESU! conserva in prosperis, excita in adversis, auge in precibus, in agone corrobora, & post mortem corona. Amen.

V I A.

Domine JESU Christe! Via, veritas, & vita nostra, qui tot hominum millia in deserto reficere dignatus es, ne deficerent in via; Et nos sæpe in viâ peregrinationis nostræ deficimus, Sit igitur panis ille cælestis, quem in communione ac-

ne accipimus, robur animæ,
nostræ: ut in fortitudine cibi
illius ambulemus usq; ad mon-
tem Sion. Erravimus à via ve-
ritatis, & justitiæ; sed reduxisti
nos, ô JESU! in viam salutis
æternæ; imò ipse factus es no-
bis via ad omnem justitiã; ad
cælum, & Patrem tuum, ut ais
Joan. 4. Nemo venit ad patrẽ
nisi per me. Vias tuas Domi-
ne demonstra mihi, & semitas
tuas edoce me: Sequi enim il-
las desidero, & tenere, JESU
bone! & te magis viam salutis
meæ infallibilem, & maximè
securam. Perfice pedes meos
tanquam cervorum; nè defici-
am.

am. Dirige in conspectu tuo
viam meam; ut non declinem
neq; ad dextram, neq; ad fini-
stram. Prohibe pedes meos à
lata & spatiosa via, quæ ducit
ad perditionem. Opus mihi
profectò est efficaci auxilio
gratiæ tuæ, ut cohibeam sensus
meos, teneamq; arctam viam,
quæ ducit ad vitam. Amor tui
mi JESU, reddat illam mihi
facilem; & ne labores, & cru-
ces impedimento mihi sint; di-
lata cor meum: ut currere pos-
sim viam mandatorum tuorū.
Deniq; ut omnes in viam salu-
tis rectam ducamur; illumina-
re his, qui in tenebris & in
umbra

umbra mortis sedent, ad dirigendos pedes nostros in viam pacis.

V I T A.

SAlvator mundi, tu fons es Somnis vitæ, tam in plantis, arboribus, & brutis, quàm hominibus, & Angelis. Imò nulla est creatura, quæ in te velut suo verissimo exemplari non vivat. Quod factum est, in ipso vita erat. Et modò omnes in te ipso vivimus, movemur, & sumus. Tuo beneficio usq; huc vita nostra fovetur, & nutritur corporalibus, & spiritualibus alimentis. Quot hominum millia temporali, & æter-

nâ morte perierunt; Tibi ô JESU! ex integro debemus; quòd præservati fimus, & in hac mortali vita in spem vitæ immortalis conservemur. Mortem quidem meriti sumus: misericordiam nihilominus & vitam á te speramus: Non enim vis mortem peccatoris, sed ut convertatur, & vivat, vitâ scilicet supernaturali, quam nisi per te ô JESU! habere non possumus. O quantas tibi gratias debeo; quòd homo fieri, & nobiscû in terra vivere volueris: ut vitam nobis cælestem, & divinam donares; Imò mori dignatus es; ut æternum viveremus.

mus. Verè dignus est morte,
qui tibi ô JESU! recusat vivere.
Utinam ego sic mihi moriar; ut
totus tibi vivam, & cum Apo-
stolo possim dicere: vivo ego
jam non ego, vivit verò in me
Christus. Verba tua sunt mi
JESU! qui manducat me, vivet
propter me. Proinde sacræ
communions beneficio me in
te converti desidero, ut vivam
propter te. Tu es panis ille vi-
vus, qui de cælo descendit; si
quis manducaverit ex hoc pa-
ne, non morietur in æternum.
Verba tua spiritus, & vita sunt,
vivifica me secundum verbum
tuum. Vivit adhuc in me ve-

tus




tus homo cum concupiscentijs
suis; Quare tuum imploro au-
xilium; ut peccatis mortuus
iustitiæ vivam. Cogitationes
meas semper animet, & diri-
gat memoria tui mi JESU! in-
tellectum da mihi, & vivam;
voluntatem meam spiritus tu-
us bonus semper possideat, &
in vitam æternam custodiat.

S A L U S.

O JESU! Salus vita, & resur-
rectio nostra. Tibi uni, &
soli omnes homines debent sa-
lutem suâ. Fuerunt multi olim
salvatores certarum tantum-
modò regionum ad tempus a-
liquod. Tu Salvator es orbis
uni-

universi perpetuus. Hanc gloriam tibi soli vendicas Isaïæ c. 43. Ego sum, Ego sum Dominus, & non est absq; me Salvator; necesse poterat, qui humanum genus perditū suo merito salvaret. Quare veniat super nos misericordia tua Domine, salutare tuum secundū eloquium tuum. Salva nos propter nomē tuum: Omnis enim qui invocaverit Nomen Domini, salvus erit. Quanto magis igitur, qui ipsum fontem omnis salutis in se receperit. Proinde instanter, & humiliter te rogo mi JESU! ut dum cor meum sub specie panis sub-

intras



intrās, salus domui meæ fiat;
nec solūm filius Abrahæ; sed &
filius Dei fiam: dedisti enim
recipientibus te potestatem fi-
lios Dei fieri. Recepi nunc te,
mi JESU! fontem omnis bene-
dictionis in domū cordis mei.
Dic modò animæ meæ, salus
tua ego sum; & dicam ego, Ec-
ce! Deus salvator meus, fiduci-
aliter agam, & non timebo.
Esto adjutor, & protector cō-
tra omnes hostes salutis meæ:
quia non est, qui tuæ possit re-
sistere voluntati, si decreveris
salvare Israel. Libera me Do-
mine, & redime me à peccatis
hominū: quia longè à peccato-
ribus

ribus salus. In te exultare spiritum meum cupio, salutare vultûs mei, & Deus meus: nec me solum; sed alios etiam salvos fieri, & ad agnitionem veritatis venire. Quare Lumē gratiæ, & fidei infunde cordibus nostris, infusum auge, augmentum conserva; ut cognoscamus in terra viam tuam, in omnibus gentibus salutare tuū: ut æternæ tandem salutis participes effecti cum sanctis in cælo cantemus; Salus, & gloria, & virtus Deo nostro in sæcula sæculorum.

AMEN.

RA-

Domine JESU Christe! tu
splendor es paternæ glo-
riæ, & figura substantiæ ejus,
idæa, & exemplar omnium,
quæ fieri possunt, Prima, & sū-
ma ratio universi, in numero,
pondere & mensura à divina
providentia dispositi, omnium
rationabilium causarum prin-
cipium, medium, & finis, ex
te ipso, per te ipsum, in te ipso
est DEO Patri Omnipotenti
omnis honor & gloria. Sum-
mas tibi gratias ago pro lumi-
ne vultûs tui, quod signatum
est super nos, & quòd ejus u-
sum, quo alij homines non pau-
ci ca-

ci carent, mihi concefferis. Da
 mihi quæſo Domine! rationē
 ſemper conformem iudicio, &
 voluntati tuæ. Norma actio-
 num mearum ſit lex tua Domi-
 ne, ut in me omnia honeſtè,
 & ſecundum ordinem fiant.
 Non tradas me pravis concu-
 piſcentijs meis: ne ſiam ſicut
 equus, & mulus, quibus non eſt
 intellectus. Sit ratio, quā de-
 diſti mihi, docibilis, ſubjecta
 tibi, & Eccleſiæ tuæ. Ego cer-
 tē libens in captivitatem redi-
 go omnem intellectum meum
 Ō JESU! credens humiliter, &
 ſimpliciter, quæ ratio mea non
 poteſt capere: Myſterium ſci-
 licet

licet SS. Trinitatis. Incarnati-
onis & Eucharistiæ, quâ me
indignum toties reficere di-
gnatus es. Et imprimis quidẽ
te in Eucharistia verè præsen-
tem esse. Nec ut hoc credam;
pignus exigo, uti judæus mira-
cula, nec ut Græcus rationes,
quibus hoc mihi persvadeam.
Credo, quod nescio, benè ha-
bet, stultus fiam, ut sim sapi-
ens. Nolo intelligere; ut cre-
dam; ne meritũ perdam; quid
quid intellectus reluctetur, hæc
est victoria, fides nostra. So-
lum mihi sufficit ô JESU! quod
dixeris te in Eucharistia præ-
sentem esse. In obsequium il-
lius

lius fidei subijcio infinitæ veracitati, & sapientiæ tuæ omnem rationem meam, humiliter rogans, ut per illuminationem vultûs tui præerves me à prudentia filiorum Agar, quæ de terra est, dones verò gratiam tuam, cujus beneficio prudentes simus, sicut serpentes, & simplices sicut columbæ, habentes fructum in sanctificationem, finem verò, vitam æternam.

SAPIENTIA.

O Sapientia! quæ ex ore altissimi prodijsti, veni ad docendum nos viam prudentiæ: ut omnia, & singula secundum

B meri-

meritum suum sciamus æstimare, & diligere, Aperi oculos meos ô JESU! qui illuminas abscondita tenebrarum: ut agnoscam, quæ & qualis sit Sapiëntiâ tua; quâm sit speciosa, & amabilis sponsa: ut totus cû Salomone in amorem ejus exardescam. Cor mundum crea in me Deus, & carnem meam ab omni immunditie libera, & præserva: quia in malevolam animam non introibit Sapiëntia, nec habitabit in corpore subdito peccatis. Sed quæ hæc bonitas, & humilitas tua, ô Divina Sapiëntia! quòd etiâ in visibili forma dignata sis in
terris


terris apparere, conversari nobiscum, & delicias tuas habere cum filiis hominū, ô si mihi liceret velut catello vel micas colligere; quæ cadunt de mensa illa, quā proponis Proverb. 9. addens: Si quis est parvulus, veniat ad me. Da quæso mi JESU cum fructu, & gustu semper manducare panem, & bibere vinum illud, quod in Epulo Eucharistico stupendâ nimis charitate nobis offers. Ciba nos pane vitæ, & intellectus, & aquâ Sapientiæ salutaris pota nos, qui factus es nobis sapientiâ à Deo, & justitia, & sanctificatio & redemptio

ptio. Da in sapientia, ætate, & gratia semper proficere: ut aliquando in templo gloriæ tuæ arcana, & mirabilia infinitæ Sapientiæ tuæ intueri nobis liceat, & prædicare.

LVMEN.

Salvator mundi, tu es Christus filius Dei vivi, Deus de Deo, lumen de lumine. Tu candor es lucis æternæ, & speculum sine macula Dei majestatis, & imago bonitatis illius. Tu lumen es ad revelationem gentium & gloriam plebis tuæ Israel. Quidquid in cælo, & in terra lucis, & splendoris est, ex te suam trahit originem

ginem. Omnes solis, & lunæ
radij in te fontem omnis lumi-
nis cum summa laude, & gra-
tiarum actione debent reflecti.
Totus stellarum exercitus lu-
ceat tibi cū jucunditate, enar-
rans gloriam tuam, & unā me-
cum nomini Tuo in æternum
benedicat; quòd mundū hunc
universum luce siderum tam
beneficā sic pergas constanter
recreare. Imprimis verò sum-
mas tibi gratias rependo, JE-
SU bone pro supernaturali illo
lumine, quod è summo cælo-
rum deferre dignatus es in mū-
dum hunc ingratum, qui te-
nebras magis, quàm lucē tu-



am diligit. Aufer quæso à cordibus nostris omnes ignorantia, & malitiæ tenebras: ut tanquam filij lucis ambulemus: fructus autem lucis est in omni bonitate, & justitia, veritate. O Sol justitiæ, qui sub speciebus Eucharisticis lates Deus verè absconditus, adauge fidem meam, & illumina oculos meos; ne unquam obdormiam in morte. Erige cor meum per fiduciam, & excita spiritum meum: ut vitale lumen tuum in me non deficiat. Ardor charitatis tuæ renes meos adurat, & quidquid in me est caloris noxij, consumat, ut in altari cordis

cordis mei purus ignis divini
amoris semper ardeat. Emit-
te lucem tuam, & veritatem
tuam; ipsa nos deducant, &
adducant, in montem sanctum
tuum, & intabernacula tua, ut
cum sanctis tuis omnibus in
gaudio, quod nemo tollet à
nobis, aliquando contēplemur
te, qui lucem habitas inacces-
sibilem.

J U D E X.

CRedo, quod redemptor me-
us vivit, & in novissimo
die de terra surrecturus sum ad
judicium; hoc qui non credit,
jam judicatus est. Crēdo Do-
mine, & credidi: quia venies

in Sanctis millibus tuis facere
judiciū contra omnes, & red-
dere unicuiq; secundum opera
sua. Sed vae mihi Domine!
quia peccavi nimis in vita mea.
Non intres in iudicium cum
feruo tuo: quia non iustifica-
bitur in conspectu tuo omnis
vivens. Rex tremendæ maje-
statis, qui salvandos salvas gra-
tis, salva me fons pietatis, se-
cundum multitudinem mise-
rationum tuarum nunc in tem-
pore sic me libera à peccatis
meis: ut nullam damnationis
materiam in iudicio relinquant.
Iuste iudex ultionis, donum
fac remissionis, ante diem ra-
tionis.

tionis. Confige timore tuo carnes meas, ut ex horrore iudiciorum tuorum ab illicitis se contineant. Quis te non timeat ô Christe! constitutus enim es à Deo iudex vivorum & mortuorum: cum acceperis tempus, etiam iustitias iudicabis. Iustitiæ meæ, sicut pannus menstruatae. Peccata mea pavesco, & ante te erubesco. Parce Domine omnibus irreverentijs, & negligentijs meis in sacra communione commissis; ne permittas quæso, ut in iudicium & condemnationem te recipiam, sed in salutē & vitam æternam. Quapropter

pter prius me indue veste nuptiali, & talibus virtutum ornamentis præpara, ut gratum semper hospitium in me invenias, præsertim in agone meo ut sacro viatico præmunitus iudicium tuum, subire non horream.

P O R T A.

G Ratiæ tibi sint immortales
Domine JESU Christe Reparator salutis humanæ! quòd ex hoc mundo ad Patrem vādens portam cœli tanto tempore nobis clausam reseraris. Contrivisti portas æreas, & vectes ferreos confregisti, ut patres nostros è limbo tecum
ad cæ-

ad cælum duceres. Nunc porta illa semper nobis aperta manet; pro quo beneficio in laudem tuam Salvator mundi, invito beatas illas animas, quæ modò introiêrunt, & omnes cælestes spiritus: Magnificate Dominum mecum, & exaltemus nomen ejus in idipsum: introite portas ejus in confessione, atria ejus in hymnis, confitemini illi. Aperite mihi portas justitiæ, ingressus in eas confitebor Domino, Redemptori meo; qui semetipsum vocare dignatus est ostium. Liceat mihi Domine JESU! saltem tempore communionis illud

lud introire. Fateor quidem
me gratiâ illâ indignum esse,
qui tibi ad ostium cordis pul-
santi aperire neglexi, vel tar-
davi: dum ad bonas inspiratio-
nes tuas non attendi. Ne quæ-
so me ideo prohibeas ab acces-
su, ut ingrediar, & egrediar,
& pascua inveniam. Da mi-
hi ingressum ad arcana Divi-
nitatis tuæ: ut ea clariùs pos-
sim intelligere, & plenius ad-
mirari; egressum verò ad my-
steria humanitatis tuæ non so-
lum te redamando, sed etiam
sequendo virtutes tuas. Ingres-
sum da mihi: ut veritates fidei
piè meditetur intellectus, &
volun-

voluntas diligat; egressum vero ut agendo, & patiendo propter te mi JESU! ostendam me verum esse discipulum tuum. Da mihi ingressum; ut præcipua mihi sit cura excolendi spiritum meum, & salutem meam in tuto collocandi; egressum vero in ædificationem proximorum; ut videant opera mea bona, & glorificent Patrem tuum qui in cælis est. O quam pingua, & delicata sunt pascua, quæ offers oviculis tuis in Eucharistiæ Sacramento: ex his sicut adipe, & pinguedine repleatur anima mea: ut cor meum, & caro mea exultent

tent in Deum vivum, cum certa spe, me portam cæli aliquādo licet angustam intraturum. Tantum adjuva me JESU bone! ut omnia ingressus illius impedimenta abijciam, & in libertate spiritus tibi ad mortem usq; fideliter deserviam.

G I G A S.

Fortissime Deus spirituum universæ carnis, elevata est magnificentia tua super cælos. Magnus es Domine, & magnitudinis tuæ non est finis. Cælum sedes tua est, & terra scabellum pedum tuorum. Sub te curvantur, qui portant orbem: & tamen, quàm magnus es &

es, & sublimis; humilia tamen
 respicis in cœlo, & in terra;
 alta verò à longè cognoscis.
 Et ideo detestor omnem arro-
 gantiam, & gigantum illorū
 superbiam, qui posuerunt car-
 nem brachium suum. Gigas
 non salvabitur in multitudine
 virtutis suæ, ait regius prophe-
 ta, & cum eodem humilis esse
 cupio, & parvulus in oculis
 meis: ut à te Deo meo contra
 omnes hostes meos confortari
 merear, & defendi. Oculi Do-
 mini contemplantur universā
 terram & præbent fortitudinē
 his, qui perfecto corde cre-
 dunt in eum. Fortitudo mea,
 & laus

& laus mea Dominus, Dominus firmamentum meum, & robur meum, & refugium meum in tribulatione. In te Domine speras non timebo, quid faciat mihi caro. Et hæc fiducia mea admodum augetur ex cibo illo, quo nos Domine JESU! recreas, & confortas in Eucharistiæ Sacramento; intra quod coarctas quodammodo immensam divinitatem tuam: ut te parvitati nostræ accommodes. Ego prosterno me profundissimè coram majestate tua infinita, & summas tibi gratias ago: quòd amore nostri ita te humilies: ut magnos

gnos nos facias. Utinam magnus essem in oculis tuis, magnus gratiâ & virtute! Tu nosti Domine, quam res angusta sit domi meæ. Gloria & divitiæ in domo ejus, quam tu benevolo cum affectu ingrederis, liceat & mihi hunc affectum experiri, & benedictionum tuarum participem fieri. Abyssus infirmitatis meæ abyssum invocat Omnipotentiae tuæ. Timeo mihi à gigante tartareo. Libera me ab insidijs ejus, & contere satanam sub pedibus nostris, ut in nomine tuo victores fiamus, & in cælis æternum aliquandò gaudeamus.

C

REX

PAter misericordiarum, &
DEUS totius consolationis,
beatus, & solus potens. Confi-
teantur nomini tuo omnes re-
ges terræ, cum omni populo,
tribu & natione: quia eripuisti
nos de potestate tenebrarum &
transtulisti in regnum filij dile-
ctionis tuæ. Te pariter Domi-
ne JESU! qui Rex potens es &
metuendus nimis, agnosco Con-
ditorē, & rectorē cæli & terræ.
Dominus universorum tu es,
constitutus Rex à Deo Patre su-
per Sion montem sanctum e-
jus; & infemore tuo scriptum
habes: Rex regum, & Dominus
domi-

dominantiū. Per te reges regnant & legum conditores jura decernunt. Divinam majestatem tuam omni, quā possum, submissione colo, veneror, adoro. Quis te non timebit, Rex gentium? qui deponis potentes de sede, & exaltas humiles. Quis pariter non amet te? qui servos tuos facis cohæredes regni tui; & ut hanc hæreditatem aliquando adeamus; non regnet peccatum in nostro mortali corpore, ut obediamus concupiscentijs eius. Mortifica Domine Iesu! omnes inordinatos motus, dominare in medio inimicorum tuorum, passionum

mearum: ut intra me, & in medio cordis mei sit & maneat regnum Dei; hoc est iustitia, & pax, & gaudium in spiritu sancto. Adveniat nobis etiam regnum tuum cæleste, & quidem beneficio regalis convivij, in quo cibo, & potu regio, hoc est carne, & sanguine tuo reficimur. Virtus illius convivij me totum sanctificet, ut legem regalem perficiam sive charitatem proximi observem, & ut ministrum decet regis æterni, bona mundi temporalia parvi faciam, quæ sursum sunt, quæram; quæ sursum sunt, sapiam. O vos aulæ cælestis proceres

Re-

Regem, cui omnia vivunt, veni-
te adoremus, & ab eodem illam
nobis gratiam exorate, ut vo-
biscū aliquando in cælis æter-
num cantare mereamur: Regi
sæculorum immortalī, & invisi-
bili soli DEO honor & gloria.

G E M M A.


O JESU! quàm speciosus for-
ma es præ filiis hominum!
tui intuitu nihil sunt flores,
stellæ, & omnes lapides preti-
osi. Nulla te, in cælo; & in
terra nobilior gēma est. Splen-
dore tuo delectantur angeli,
rapiuntur homines, dæmones
excæcantur. Omne aurum in
comparatione tui arena est exi-

gua, & tanquam lutum æstí-
matur argentum in conspectu
Tui. Tu es una illa pretiosa
margarita evangelica, præ cun-
ctis mundi opibus emenda. O
quàm doleo mi JESU! te pas-
sim ab hominibus ita vilipen-
di. Aperi Pater luminum ocu-
los cordis nostri; ut cognosca-
mus, quæ & quanta bona ha-
beamus in unico Filio tuo; quàm
pretiosa generis humani gem-
ma sit JESUS Christus: ut illa
nascantur in corde nostro per
fidem, augeatur per spem, &
per charitatem solide scat. Æ-
stiment trapezitæ lapillos fu-
os, quantum velint, tu ô JE-
SV!

SV! eris mihi gazis mundi omnibus pretiosior. Fulgore tuo non exterius, sed interius splendere desidero, ac memoriam meam recordatione tui suavissima illustrari. Esto rationale pectoris mei, tot gemmis distinctum, quod Evangelij veritatibus, à quibus omnem lucem, & claritatem suam intellectus meus mutuatur. Esto unicus, ac maximus thesaurus cordis mei, à quo omne decus suum, ac pretium affectus voluntatis meæ accipiant; tunc præsertim, quando in sacra communione te recipio; tunc inquam velis mihi com-

municare fructus illos spiritu-
ales; quos dare soles electis Tu-
is. Tunc liceat mihi inæstima-
bilis thesauri gaudium, & so-
latium in spiritu percipere: ut
cum sponsa possim dicere: in-
veni, quem diligit anima mea
tenui eum, nec dimittā. Vbi
est thesaurus meus, ibi erit &
cor meum. Et ideo mi JESU!
eris signaculum cordis mei; ut
in me viva tui imago talem a-
moris affectum imprimat, ut
me tibi indissolubili vinculo
conjungat. Eris signaculum
super brachium meum: quia
ad mortem usq; quæ sunt offi-
cij mei, amore tui desidero o-
perari.

PRO-



PROPHETA.

Domine JESU Christe, credo te regem esse Prophetarum omnium. Tu sensus arcanos futurorum olim inspirasti videntibus, tu ora eorum aperuisti; imò ipse te in prophetis prædicasti. Hinc testimonium JESU est spiritus prophetiæ, quem, uti veneror, & amo, ita salutarem mihi fore confido, summas tibi gratias referens, summas laudes, & benedictiones: quòd in certa & occulta sapientiæ tuæ manifestâris nobis, & mysteria regni tui revelaveris. In te fideles inventi prophetæ, & testimo-

stimoniam eorum credibilia facta sunt nimis. In te instaurata, & recapitulata sunt in dispensatione plenitudinis temporū, quæ in figuris testamenti veteris contigerunt. Tibi omnes Prophetæ testimonium perhibent, & Prophetias eorum implendas esse totum clamat Evāgelium: in quo hæc etiā continetur prophetia: qui manducat hunc panem, vivet in æternum. Hanc ego certo certius implendam credo, & spero cælum & terra peribunt, verba autem tua non præteribunt, cum prorsus sit impossibile, te promissis non staturum, modo
ex par-

ex parte mea defectus non fuerit. Proinde rogo te mi JESU! ut succurras infirmitati meæ & defectū meū suppleas. Offero tibi desiderium cordis mei ita te in communione suscipiendi, sicut decet & oportet; ut perficiantur in me, quæ dicta & promissa sunt mihi à Domino. Præterea uti firmiter teneo, quæ de adventu tuo primo ô JESU! scripturæ afferunt impleta esse; ita indubitanter credo, quæ de adventu tuo secundo, de universali iudicio, & resurrectione mortuorum, eadem scripturæ prædicunt, implenda esse. Jota unum

num, aut unus apex non præteribit à lege, donec omnia fiant. Interim adauge nobis fidem, & dona talem vitam temporalem, quæ nobis prophetet æternam.

SACERDOS.

SAlvator mundi! tu es sacerdos in æternum secundum ordinem Melchisedech: quæ enim in figura habuit, & fecit Rex ille, & sacerdos; tibi in veritate conveniunt. Tu verus es Melchisedech, id est, Rex justitiæ, imò ipsa justitia. Rex Salem, quod est Rex pacis imò pax nostra. Tibi summa convenit benedicendi potestas

Quare

Quare benedictus Deus, & Pater Domini nostri JESU Christi, qui benedixit nos in omni benedictione spiritali in cælestibus in Christo. Tu solus es, qui sempiternum sustines sacerdotium; unde & salvare in perpetuum potes accedentes per remetipsum ad Deum. Tu deniq; panem, & vinum; hoc est corpus, & sanguinem tuum Deo Patri obtulisti sacerdos, & sacrificium simul, omnibus veteris testamenti victimis, hostijs, & holocaustis infinite præstantius, in te perficiens, & consummans, quidquid fuit legalis olim sacrificij. Esto igitur

tur sacrificium nostrum latre-
uticum: Nihil enim Deo Patri
tuo excellentius offerre possu-
mus; nihil acceptius, quàm te
Filiū ejus unigenitum, in te-
stimonium divinæ excellentiæ
& Omnipotentia; in protesta-
tionem supremi domini; in
omnes creaturas, absolutique
imperij in vitam, & mortem.
Esto sacrificium nostrum Eu-
charisticū. Nos impares pror-
sus sumus referendis gratijs.
Tu solus nobis in eundem fi-
nem sufficis in missæ sacrificio,
quare in eodem te omni, quo
fieri potest, amoris & gratitu-
dinis affectu offerri cupimus
æter-

æterno Patri tuo; te inquam
fontem bonorum omnium; ut
non obstante nostrâ malitiâ,
beneficè in salutem nostram
fluere non desinas. Esto sacri-
ficiū nostrum propitiatoriū
cum omnibus tuis lachrymis,
laboribus, opprobrijs, & san-
guinis effusionibus, valoris &
pretij infiniti, in hostiam pla-
cationis dignissimam, & suffi-
cientissimum pro meis, & to-
tius mundi peccatis. Esto de-
niq; sacrificiū nostrum im-
petratorium: ut per omnia vi-
tæ, passionis, & mortis tuæ
merita peccatoribus venia, in-
fidelibus, & hæreticis conver-
sionis

sionis gratia, iustis perseverantia, defunctis indulgentia cōcedatur. Amen.

M E S S I A S.


O JESU Fili Mariæ Virginis
Tu verus es ille patribus in
lege veteri promissus Messias,
qui in hunc mundum venisti,
nec alium expectamus. Tu ve-
rus es Messias à Deo Patre no-
bis missus, tanquam legatus an-
nuncians redemptionem co-
piosam. Ego firmissimè credo,
omnia impleta esse, quæ in le-
ge, psalmis, & prophetis di-
cta sunt de primo adventu tuo.
Fuit quidem ille humilis, & de-
spectus, ita, ut judæis scandalū
fuerit

fuerit, gentibus autem stultitia;
 sed absit Domine JESU! ut
 mihi scandalo sit humilitas,
 paupertas, & passio tua, sed po-
 tiùs stimulo ad maiorem amo-
 rem tui, & imitationem. Cre-
 do enim certissimè, quia oport-
 uit Christum pati & ita intra-
 re in gloriam suam, quam &
 ego spero tuis ó Messia! me-
 ritis omnino confisus; ut hic
 communicantes passionibus tu-
 is, in revelatione gloriæ tuæ
 post hanc vitam gaudeamus
 exultantes. Gratias quoq; ma-
 ximas tibi ago: quòd nos mi-
 seros Adæ filios à spirituali per-
 ditione, & æterna servitute dæ-

D

monis,

monis, & peccati liberaveris. Frustra aliam liberationem expectant judæi: quorum tamen misereri velis; ut, quæ supersunt reliquiæ Israel, unà cum gentilibus & hæreticis salventur, & fiat unum ovile, & unus pastor. Nos autem populus tuus, & oves pascuæ tuæ exultamus in domino: quia invenimus Messiam, quòd interpretatur Christus, spe gaudentes, fore nos participes salutiferæ unctionis. Lampas mea Domine JESU nec munda, nec ornata, nec sufficienti oleo instructa est. Proinde cum anima mea desideret esse inter
pru-



prudentes virgines, munda eā
à cunctis sordibus peccatorum,
& gratiarum tuarum cimelijs
exorna; tunc præsertim, quan-
do obviam eundem est spon-
so venienti Eucharistico: ut
oleo benedictionum tuarum
repleri merear, & liberari ali-
quando ab auditione mala fa-
talis illius: nescio vos. Quare
gratia tua Domine JESU me
præveniat, & concomitetur,
lumbos meos præcingat, &
lucernas ardentes in manibus
meis teneat, & conservet, ita-
que me præparet; ut, cum ve-
neris, me vigilantem invenias.

D2

SABA-



SABAOTH.

Salvator mundi! Deus exercituum in cælo; & in terra terribilis, & potens nimis. Tota cælorum militia est ad nutum tuum, ut castrorum acies ordinata. Stellæ omnes tuo moventur, gyrantur, oriuntur, & occidunt imperio, paratæ in ultionem inimicorum tuorum. Quis te non timeat mi Deus, tecum pugnabit ipse orbis terrarum contra insensatos, inter quos ego miser peccator nunc, cum dies salutis sunt, tibi humiliter supplico mi JESU & præoccupo faciem tuam in confessione iniquitatis meæ:
ut mi-

ut miserearis mei, & proijcias
post tergum tuum omnia pec-
cata mea. Parafti in conspe-
ctu meo mensam adverſus eos,
qui tribulant me; & hujus men-
ſæ beneficio non ſolum ſpero
auxilium gratiæ tuæ; ſed etiã
ſalutem ex inimicis noſtris, &
de manu omnium, qui oderunt
nos. Quàm terribilis præterea
ô Deus Sabaoth eſt Angelorũ
tuorũ exercitus! quã potens &
numeroſus millia milliũ, & de-
cies millies centena millia aſſi-
ſtunt tibi. In conſpectu horũ
Angelorũ omniũ pfallã tibi De-
us Sabaoth! adorabo ad Tẽplũ
Sanctũ tuũ, & cõfitebor nomini
D; tuo.

tuo. Summas quoq; gratias tibi ago, quod eisdem feceris administratorios spiritus: ut nobis hic militantibus adessent. Est nobis colluctatio adversus principes, & potestas. Adjuva nos Deus salutaris noster, & propter gloriam nominis tui succurre nobis: ut instructi armaturâ Dei possimus resistere in die malo, & in omnibus perfecti stare. Conforta nos etiam, nō deficiamus in pugna pane Eucharistico: ut quoties eodem vescimur, novas vires contra spiritualia nequitiae in cælestibus acquiramus. Instrue nos & corrobora spirituali armatu-

maturâ; atq; ita militemus militiam bonam, habentes, fidem, & bonam conscientiam cum certa spe, repositam nobis esse coronam justitiæ, quã reddet nobis Deus, justus Judex. Amen.

R A B B I.

Domine JESU Christe! scimus, quia à Deo venisti magister. Beatus, quẽ tu erudieris Domine, & de lege tua docueris eum. Loquere igitur mihi Domine; quia audit servus tuus, viam justificationum tuarum instrue me. Servus tuus sum ego, da mihi intellectũ ut sciam testimonia tua. Boni-

D4

tatem,

tatem, & disciplinam, & scientiam doce me: quia mandatis tuis credidi. O Rabboni suavissime! ad quem aliū ibimus, quā ad te; Verba vitæ æternæ habes, & nos credimus, & cognovimus, quia tu es Christus Filius Dei, in quo sunt omnes thesauri sapientiæ, & scientiæ Dei absconditi. Summæ tibi sint laudes, & benedictiones pro sacris tuis instructionibus, monitis, & parabolis; pro laboribus & molestiis, in prædicando nobis Evangelio toleratis. Specialiter tamē humilitatem nos docere voluisti exemplo magis, quā verbo,

bo, quando te abjecisti ad pedes discipulorum tuorum ablucandos. Dona nobis hanc gratiam; ut mundo semper, ac humili corde ad sacram Mensam tuam accedamus, in fractione istius panis illuminemur, & ad amorem tui magis accendamus. O Rabboni! suscipe me quæso inter discipulos tuos, quorum insigne est mutua charitas. Simplex, & rectus corde esse desidero: quia cum simplicibus est sermocinatio tua, & intellectum das parvulis. Nolo scientiam quæ inflat, sed magis charitatem, quæ ædificet. Opto magis sentire compunctio-

etionem, quàm scire ejus definitionem. In minerval me ipsum tibi offero malum, rudē, imperfectum; redde me mihi bonum, legis tuæ peritum, & perfectum. Serva nos denique Magister bone, in vera Evangelij tui doctrina, ut non simus parvuli fluctuantes: & circumferamur omni vento doctrinæ in nequitia hominum. Libera nos etiā ab inordinato multa sciendi desiderio; nôsse enim te consummata justitia est, & scire justitiam, & virtutem tuam, radix est immortalitatis.

SPON-

SAlvator mundi! Sponsus sanguinum tu mihi es: vix enim in hunc mundum natus eras è Matre Virgine, velut sponsus egressus è thalamo suo, sanguinem fudisti in circumcisione, ut te Filium Abrahæ esse ostenderes, nobis verò humilitatem & obedientiam commendares. Utramq; hanc virtutem ad salutem necessariam, donari à te mihi humillime flagito. Sed quos labores mi JESU! subiijsti in gratiam sponsæ Ecclesiæ tuæ imò in mortē temetipsum tradidisti, ut illam sanctificares, mundans eam lavacro aquæ, in verbo

verbo vitæ, & exhiberes tibi
gloriosam Ecclesiam, non ha-
bentem maculam, aut rugam.
Quòd autem me hujus Eccle-
siæ tuæ membrum esse volueris
& usq; huc conservâris, im-
mortales tibi gratias, & laudes
inæternum à fidelibus tuis o-
mnibus referri desidero; unum
insuper petens: ut tibi, & Ec-
clesiæ tuæ semper in fide, spe,
& charitate conjunctus vivam,
& moriar. Sed quis ego sum
Domine! ut sponsus esse desi-
deres animæ meæ? Ad pedes
tuos me projicio; quamvis di-
gnus non sim, solvere corrigi-
am calceamenti tui. Quid est,
quod

quod adeò magnificas me, aut
quid apponis erga me cor tu-
um: ut mecum cupias despon-
sari; O Domine, ego servus tu-
us, ego servus tuus, & filius an-
cillæ tuæ. Anima mea, quam
facere dignaris sociam mensæ.
sociam regni, & thalami tui,
in æternum vivet tibi, & servi-
et. Unum doleo, cum Sponsus
sis pulcherrimus, tam foedam
esse animam meam. O si orna-
ta esset donis & gratijs tuis, &
coram te appareret in vestitu
deaurato circumdata varietate,
ut invenire posset gratiam
in oculis tuis Domine: ante te
omne desiderium meū; & ge-
mitus

mitus meus non est absconditus. Scio etiam Domine quia Sponsus es zelotypus. Perdidisti omnes, qui fornicantur abs te. Quare cor meum gratiâ tuâ peto stabiliri. Et quia vis sponsas habere vigiles, & paratas, sit anima mea per singulare auxilium gratiæ tuæ virgo, fide & moribus integra, ornata lâpade, & oleo semper instructa: ut cum veneris, parata ad cœlestes nuptias tecum mereatur introire.

MEDIATOR.

CRedo Domine: quia unus Deus, unus & Mediator Dei, & hominum homo Christus

stus JEZUS, qui dedit redemptionem semet ipsum pro omnibus; & quidem medio tam stupendo, ut Deus homo fieret, & homo Deus: Sola enim natura divina pati non poterat, nec humana sola condigne satisfacere. Proinde persona tua ô Christe! mediatrix extitit, divinis humana socians, ima summis. Ego certè summum illud & ineffabile Sacramentum Dominicæ Incarnationis summo-perè veneror & adoro, divinam in illo sapientiam & potentiã suspicio; revereor justitiam; bonitatem tuam, & misericordiam infinitam amo, & amari ab
omni-

omnibus, & deprædicari æternum cupio. Hoc medio duos populos, gentiles & hebræos in pace conjunxisti, fecisti utraque unum medium parietem macerie solvens: ut duos conderes in temetipso in unum novum hominem, faciens pacem, & reconcilians ambos in uno corpore, Deo per crucem. Peto proinde à te mi Iesu! ut per te Deo Patri simus, & maneamus semper reconciliati: & nos invicem sicut membra unius corporis diligamus, habentes pacem ad omnes; & hanc mutuam charitatem per Eucharistiam, quæ Sacramentum est unita-

unitatis, in me, & in alijs ita
foveri, & confirmari desidero:
ut secluso omni mundano, &
carnali amore diligamus nos
invicem, sicut tu dilexisti nos,
Simul etiam summas tibi gra-
tias ago, quòd jam moriturus
duos inter latrones salutem no-
stram in medio terræ operatus
sis, novi Testamenti Mediator
existens, ut morte tuâ interce-
dente repromissionem accipe-
rent, qui vocati sunt, æternæ
hæreditatis, cujus & nos velis
participes facere, & certiores
reddere, quoties ejus arham
sive sacram communionem re-
cipimus: ut te Mediatorem no-
strum

strum fuisse in terris, æternum
gaudeamus in cælis.

V I R G A.

Domine Jesu Christe! de te
impleta est Balaami pro
phetia: Consurget Virga de I-
srael, & percutiet duces Moab.
Virga longè excellentior & mi-
rabiliior, quàm Virga Moyfis.
Hæc Judæos liberavit per tran-
situm maris rubri, à servitute
Ægypti, & in deserto juxta ad
terram promissionis. Sed ubi
Virgam virtutis suæ emisit Do-
minus ex Sion, sive Pater Fili-
um suum in hunc mundum, à
tyrannide, & servitute dæmonis
liberati sumus, & via nobis o-
mni-

mnibus per mare rubrum Dominicæ Passionis ad cælum est patefacta. Et hanc Virgam nō in arca veteris, sed novi testamenti repositam servamus, & veneramur dum te ô Christelesu! in Venerabili Sacramento colimus & adoramus. Esto nobis Virga semper florida, & fructifera. Virga directionis, Virga regni tui. Dilexisti iustitiam, & odisti iniquitatem: ita, ut non solum justus sis, & rectum iudicium tuum; sed ipsa rectitudo, iustitia, & æquitas. Utinam dirigantur viæ meæ ad custodiendas justificationes tuas. Illis est difformis voluntas

nostra, tu illam corrige; & cum distorta sit, legi tuæ conforma: nam lex tua æquitas. Corrigat quoque errantem gradum meum Virga disciplinæ tuæ. Ne quæso! parcas peccanti oviculæ: plus enim timeo dentes lupi, quàm Virgam pastoris. E numero filiorum tuorum esse cupio, quos flagellas & recipis. Modò da patientiam, postea indulgentiam. Virga tua, & baculus tuus ipsa nos consolentur: quia signum sunt, quòd velut pater nos diligas, & æternæ hæreditati reserves. Libera me à virga illa ferrera, quâ reprobos æternum punis; & timor virgæ

virgæ hujus faciat me vigilan-
tem, & sollicitum ambulare in
præceptis tuis, omnibus diebus
vitæ meæ.

C O L U M N A.

Salvator Mundi! Tu Colu-
mna es Ecclesiæ tuæ rectissi-
ma ad omnem summæ perfecti-
onis regulam efformata. Recti
diligunt te. Tu pariter IESU
bone! benefac bonis, & rectis
corde, ut à norma justitiæ nun-
quam deflectant. Tu Columna
es principalis, & nobilissima:
Quid enim Divinitate tuâ ex-
cellentius? quid tuâ humanita-
te præstantius? A te omnem
decorem, prætium, & robur su-

um cætera Ecclesiæ fulcra mutu-
uantur; pro quibus tuam de-
præcamur clementiam : ut in
gratia, & charitate Dei confir-
mentur ad gloriam nominis tui
& fidelium salutem. Tu Colum-
na es firmissima. Aliæ colu-
mnæ, quæ nutantem sustenta-
runt Ecclesiam, tuo stetere be-
neficio; vel si proprijs stare viri-
bus conatæ sunt, turpiter ceci-
derunt. Per te est, & manet
Ecclesia tua Columna, & fir-
mamentum veritatis, nec por-
tæ inferi prævalebunt adversus
eam. Super arenam ædificat,
qui confidit in alio, quàm in te
Iesu Salvatore meo. Dominus
firma-

firmamentum meum, & refugium meum, basis & columna mea, fortitudo mea, & laus mea Dominus. Olim Iudæos Columna nubis, & ignis per desertum duxit. Nobis fidelibus tuis ô Christe! tu ipse es Columna ignis quâ Deus, & Columna nubis quâ homo: obvelas enim Divinitatem humanitate tuâ; utramq; verò speciebus Eucharisticis: ut velut cæleste manna nobis esse possis in cibum solidum, quò roborare digneris intellectum nostrum & confirmare voluntatem nostram: ut in servitio tuo immobiles reddamur. Quærant me

infirmare, & deijcere inimici mei; sed dona mihi contra eos pugnare fortiter, & feliciter: ut de relatis victorijs juges tibi gratias referre possim in templo gloriæ tuæ, & inter beatos ejus incolas aliquando merear numerari secundum illud, quod promifisti Apocaly. c. 3. qui vicerit, faciam illum Columnam in templo Dei mei.

M A N U S.

SAncta Trinitas unus Deus !
 adoro omnipotentiam, sapientiam, & bonitatem tuam infinitam. Hi sunt tres illi digiti, quibus appendis orbem terrarum, & conservas. Imprimis

primis tamen immensam virtutem tuam revereor omnipotens Pater, quia in magnitudine brachii tui condidisti universum tuum brachium cum potentia, jure ait Propheta. Sed quæ Manus tua, nisi Filius tuus, omnia per ipsum facta sunt, sine ipso factum est nihil. Ipse est dextera tua, cælestis Pater, de qua regius Vates :
 Dextera Domini fecit virtutem
 dextera Domini exaltavit nos,
 & salvos nos fecit, mittens Spiritum sanctum, qui cœlestium gratiarum abundantia nos cumulavit. Verè digitus Dei est hic, scribens legem charitatis,
 non

non in tabulis lapideis; sed in
tabulis cordis carnalibus. Quis
mihi det, aureos characteres
hujus digiti ut cordi meo sēper
inscriptos geram! Quærunt il-
los delere maligni spiritus. Sed
quæso Domine! experiantur
virtutē brachij tui, dextera tua
& brachium tuum, & illumi-
natio vultus tui sufficiunt mihi
Domine, & ego despiciam o-
mnes inimicos meos. Sed pe-
culiaries gratias tibi debeo Sal-
vator Mundi! non solum, quia
Manus tuæ fecerunt me, & pla-
smaverunt me; sed etiam, quia
Manus tuæ distillaverunt myr-
rham propter me, & in Mani-
bus

bus tuis descripsisti me. Thomæ olim dixisti: vide Manus meas, & ego illas video oculis fidei. Sed quid sunt plagæ istæ in medio manuum tuarum nûm impressæ sunt stylo ferreo nostrorum scelerum! ò quàm doleo, mi JESU! quàm doleo te sic peccatis nostris vulneratum, vix audeo ad te manus supplices tendere. Juvat tamen adhuc sperare: quia non est abbreviata Manus Domini. Imò cum tot peccatores suscipiat dextera tua Domine; Et ego in Manus tuas commendo spiritum meum: ut post hanc vitam

cum



cum electis tuis ad dexteram
Patris merear collocari.

P E T R A.

Domine Iesu Christe! Tu
ipse es fundamentum soli-
dissimum Ecclesiæ tuæ supra
Petram ædificatæ. Petra autē
erat Christus. Et super te, so-
lam Ecclesiam Romano-Ca-
tholicam fundatam esse, pro-
bat continuata per annos 1735.
Vicariorum tuorum series, ab
eo cæpta, de quo ipse dixisti:
Tu es Petrus, & super hanc Pe-
tram ædificabo Ecclesiam me-
am. Summas tibi gratias ha-
beo: quod in eadem usque huc
me conservâris. Statuisti super
Petram

Petram pedes meos, & direxisti gressus meos. Confirma ô Deus! quod operatus es in me, ne de hac Petra moveantur vestigia mea: ut sim, & maneam fidelis, & obediens filius Ecclesiæ tuæ. Ad eum finem desidero mi IESU! in te requiescere: ne periclitetur salus mea. Lepusculus, plebs invalida, qui collocat in Petra cubile suum. Et ego infirmus homuncio unicum refugium meum quæro apud te ô Christe! tu juvare me in omnibus potes. Languentem refice, conforta debilem, paventem anima. Dum te mihi das in cænam, cubile in pascuo,

fcuo, & pascuum in cubili in-
venio; dum enim nutris spiri-
tum meum, svaviter quiescit, &
ipsa quies nutrimentum est spi-
ritûs mei. Nec potus mihi de-
est, cùm sis Petra illa, quæ lan-
ceâ militis percussa est, & exi-
vit sanguis & aqua. Hoc du-
plici rivo digneris corpus & a-
nimam meam à cunctis macu-
lis purgare, ut ausim eò acce-
dere, quò invitat Isaias: Ingre-
dere in Petram, & abscondere
in fossa humo. Nonne tu es
Petra hæc mi JESU! Quò fugi-
am miser ego peccator, nisi ad
te? Petra refugium erinaciis.
In foraminibus Petræ, in vul-
neri-

neribus tuis latebo imposterum
ut tutus sim ab insidijs circum-
venientium animam meam.
Hic gemam in cavernis Mace-
riæ, sicut pullus hirundinis, &
meditabor ut columba. Latus
tuum apertum ô JESU! in spi-
ritu subintro. Liceat mihi hic
fugere mel de Petra, & haurire
in gaudio aquam vitæ. Quasi
turtur ibidem figere quæro ni-
dulum meum. Hic requies mea
hic habitabo: quoniam elegi e-
am. Absconde me denique ô
JESU! à facie furoris tui in fos-
sa humo manuum ac pedum tu-
orum, quos pio amoris affectu
exosculor, & amplector cum
Publi,

Publicano rogans: Deus propitius esto mihi peccatori.

F I L I U S.

Salvator mundi! sicut es verus Dei Filius, ita & verus es Filius hominis. Utrumq; non solum credo, & assensu indubitato confirmo; sed etiam ore, & lingvâ profiteor. Utrumq; vel alterutrū qui negat, filius mortis est. Quare abominor ex toto spiritu omnes illas hæreses ô Christe! quæ vel tuam divinitatem, vel humanitatem oppugnarunt. Fiant omnes illæ in interitum, & pereat de terra memoria earum. E contra una, & sola hæc fides in orbe terrarum
flore-

floreat, quæ docet, Christum
verum esse Filium Dei, & ho-
minis. Imprimis igitur credo
mi JESU! te ab æterno genitū
esse à Patre cælesti: ab eodem
enim per intellectum procedis
in summam similitudinem, hoc
est, identitatem naturæ, ut ver-
bum Patris, imago Dei invisi-
bilis, & figura substantiæ ejus.
Proinde eodem cultu Patriæ,
quo Deum colo, & te Filium
Dei veneror, adorans in Filio
Patrem, & in Patre Filium ex
toto cordis affectu desiderans,
dari nobis omnibus sensum: ut
cognoscamus verum Deum, &
simus in verò Filio ejus; hic est

F

verus

verus Deus, & vita æterna. Sed quæ hæc dignatio Charitatis tuæ Fili Dei, ut etiam Filius hominis amore nostri fieres, & veram carnem nostris miseriis obnoxiam assumeres? Detestor enim illas hæreses, quæ te verum hominem, & Mariam Virginem, veram Matrem tuam fuisse unquam negarunt. Verbum caro factum est, & habitavit in nobis. Et (quæ major est gratia) in dies subire habitaculum nostrum sua reali præsentia dignatur. Ego Domine JESU! ante veram divinitatem & humanitatem tuam in spiritu prostratus, profiteor me non posse

posse dignas gratiarū actiones;
& laudes referre. Parce mihi,
quòd hucusque tā ingratus fue-
rim. Offero tibi in satisfactio-
nē qualemcunque omnia illa
obsequia, quæ unquā tibi á San-
ctis tuis exhibita placuerunt; &
simul humiliter peto: ut gra-
tiam adoptionis, quam ut
Filius Dei naturalis incarnatus
nobis es promeritus, adipisca-
mur, conservemus & fructum
ejus, id est, coelestem hæredita-
tem consequamur. Amen.

E M A N U E L

Verus Emanuel es ô Chrîste!
nobiscum Deus, non solum
per reconciliationem, & gra-

Fz

tiam

tiam, quam nobis es promeritus; sed magis per assumptionem humanitatis nostræ, ita, ut liceat mihi dicere; frater meus es tu, os meum, & caro mea. Quomodo potuisti magis nobiscum esse? quam naturam nostram ita tibi uniendo: ut divinâ personâ tua subsisteret; & Deus homo fieret, & homo Deus. Quid est homo, quia magnificas eum, aut quid apponis erga eum cor tuum? Oblivisceris quodammodo dignitatis tuæ ut Emanuel noster esse possis. Fateor quidem mi JESU! peccatis meis sum meritis, ut longè recedas à me, & derelinquas
me

me usquequaque: quia & ego
recessi à te, & tecum esse no-
lui. Sed doleo ex animo, pudet
me ingratitudinis summæ, pæ-
nitet insipientiæ meæ. Quo-
modo potui velle, non esse te-
cum; Ignosce quæso culpam fa-
tenti, & roganti veniam. Heu!
me nimis miserum & infelicem
si me deferas, & mecum esse
nolis. Sed consolantur me ver-
ba tua mi JESV! Ecce ego vo-
biscum sum usque ad consum-
mationem sæculi. Nec solum
per gratiam tuam, sed etiam
(quod summum amoris tui er-
ga nos est testimonium) in Eu-
charistia, corporali tuâ præsen-

tiâ nobiscū esse voluisti. Sūma
tibi laus, honor, benedictio &
gratiarū actio reddatur ab omni
creatura pro singulari isto amo-
re; & dona nobis amorē tui re-
ciprocū, qui in æternū duret.
Ego etiam mi Deus tecū esse &
manere cupio Tui memoriâ de-
lectari, intellectū meū tecū sa-
pere in idipsū, & sentire, quod
& in Christo JESU! voluntatē
meam cum divina semper con-
venire. Me tecū & te mecū ef-
se desidero in adversis omnibus
præsertim in agone vitæ meæ,
si ambulavero in medio um-
bræ mortis, non timebo mala,
si mecum fueris. Denique post
hanc

hanc vitam in cælo tecum esse
cupio: ut in te Emanuele meo
suavissimò gaudere semper pos-
sim, & exultare.

V I N E A.

Domine JESV Christe! Tu
Vinea Domini Sabaoth,
fundamentum solidum omnis
fructiferæ plantationis; quæ e-
nim in te à cœlesti Patre tuo
plantata non est, eradicabitur.
Et hinc necesse est, omnem ra-
dicem boni operis, quæ in te ô
Jesu! fundata non est, arescere
& deficere: cum debeas omnẽ
succum spiritualem, quo interi-
or vita alitur, & conservatur,
subministrare. Et ideo sicut

planta terræ; ita & anima mea
tibi ô Christe adhærere firmi-
ter, & inhærere constanter de-
siderat: ut bona germina, sive
bonas cogitationes, & bonos
virtutum flores & fructus pro-
ferre possit. Tu Vineæ es flori-
dissima: aliæ quidem vineæ flo-
rentes dederunt odorem suum
sed tibi debent ô Christe! omne
quod habent, & unde placent,
in acceptis referre. O quàm pre-
tiosum est vinum illud, quod
nobis offert Vineæ Domini Sa-
baoth. Vinum hoc Sanguis tu-
us est ô JESU! cujus in com-
munionem sumus participes Et
hoc tuo sacratissimo Sanguine
suffo-

suffoca in me, quidquid est sentium & spinarum, irriga & fecunda sterilitatem animæ meæ præserva me ab omni intemperie affectuum, ne labruscas feram; sed uvas vino amoris Dei plenas. Tu ô Christe! vinea es securissima; & ideo radicem vitæ meæ spiritualis in te constanter permanere desidero. Sub tua protectione & custodia non timeo mihi à vulpeculis, quæ demoliuntur vineas; non à frigore & pruina acediæ, non a mortifera corruptione hostis cujuscunque extranei. Unum timeo, ne me ipsum custodiæ tuæ subducatur, & seducat

con-

concupiscentia mea. Confige timore tuo carnes meas, & sepimentum spiritus mei sit horror judiciorum tuorum, ut apud te, & in te semper maneam, & inter mansiones multas in domo Patris tui locum aliquem inveniam.

P A S T O R.

A Bunde modò implesti Salvator mundi, quod Ezechielis 34. promifisti. Ecce ego ipse requiram oves meas, & visitabo eas. Nam formam servi accipiens 99. oves reliquisti, ut unam in terris salvares humanam oviculam. Verè Pastor bonus es: Pascis enim secundū divi-

divinam naturam omnem carnem super universam terram. Proin, sicut impleas omne animal benedictione; ita vicissim ab omni animali cælum & terram tui laude, & benedictione impleri desidero. Sed quàm bonus Pastor es animarum nostrarum? quot labores, & ærumnas tolerasti: ut oves perditas recuperares. Quanto tibi solatio fuit, & gaudio, recuperasse? ita, ut diceres: congratulamini mihi, quia inveni ovem meam quæ perierat. Imò, ut bonus Pastor dedisti animam pro ovibus tuis, ne perirent. Majora sunt merita tua, ô pastor bone!

ne! quam, ut par à nobis reddi possit. In æternum laudetur infinita bonitas & misericordia tua, quæ præterea nobis dedit pascua tam salutaria, sacras scilicet Scripturas, ex quibus animam meam saginari cupio; imprimis verò intellectum meum ita imbui divinis veritatibus, ut in medulla omnis sapientia, hoc est, in te Deo meo conquiescat. Deinde quæ præclara, suaviaque sunt pascua, Ecclesiæ Sacramenta? Omnia in illis spirant gratiam, veniam, pacem, favorem, & charitatem tuam ô JESU! Quid? quod in cibum, ac potum nobis offeras

ras

ras carnem tuam, & sanguinē
tuum? Manhu! Pastor bone!
quis hic amor tuus? ut cibus ef-
se velis animæ meæ, miserrimæ
oviculæ tuæ. Dignare quæso
mi Jesu! in virtute sacratissimi
corporis & sanguinis tui con-
servare vitam meam spiritualē,
eamque confortare: ut ex te,
per te, in te, & propter te vivam
& moriar. Cum verò pro tan-
to tuo erga nos amore tibi di-
gnas referre gratias nemo no-
strum possit, sufficiat tibi vo-
luntas bona ovium tuarum, &
perge nos tua pastoralis curâ fo-
vare, & conservare. Custodi
nos ab illis, qui veniunt in ve-
stimentis

stimentis ovium, intrinsecus autem sunt lupi rapaces. Auge in nobis amorem, & fiduciam erga te, etiā, dū virgā pastorali nos percutis. Conserva nos in simplicitate & prudentia, fac nos deniq; pascua spiritualia ita frequentare; ut ab æternis & cælestibus non excludamur.

O V I S.

O Cælestis Pater! omnes nos, quasi oves erravimus, æstimati sumus, sicut oves occisionis. Nequaquā tamen desperamus ō Pater misericordiarum quamvis impossibile nobis sit, pro delictis satisfacere. Si vadem requiris, ecce Filius tuus!

qui

qui vix natus è Matre Virgine
 tanquam Ovis in stabulo, ad
 macellū continuò quæsitus est.
 Illum tibi offero, omnesq; ejus
 dolores, angustias, & persecu-
 tiones, quas in Ægypto, & Ju-
 dæa toto tempore vitæ suæ per-
 pessus est. Quod insidias vitæ
 tuæ mi JESU struxerunt Scribæ
 & Pharisæi, quasi lupi rapaces
 quot injurijs, & contumelijs te
 affecerunt? Et tamen, quā admi-
 rabilis fuit tua humilitas, &
 patientia? Eras quasi homo nō
 audiens, & non habens in ore
 suo redargutiones. Confundit
 hæc mansuetudo tua, mi Jesu!
 impatientiā meam, qui vix a-
 marius

marius verbum sufferre possū.
Tu verò ad colaphos, & flagella quasi agnus coram tondente se obmutuisti: ut doceres nos vincere in bono malum & irā cohibere. Ignosce quæso Salvator! quòd hanc doctrinam tuam tam parum secutus sim. Dixi confitebor adversum me injustitiam, & impatientiam meam, & tu remittes impietatem peccati mei, Tu inquam, qui es patiens, longanimis, & multum misericors; & dona nobis virtutem mansuetudinis, & patientiæ in adversis quibuscunque. Gratias denique tibi ago mi Jesu! quia pro salute nostra,

nostra, sicut Ovis ad occisionē
ductus es, in ara Crucis hostia
placationis factus. Id unum
suppliciter rogo, ut in commu-
nionē salutarem illius hostiæ
fructum consequamur, & me-
ritorum tuorum participes ef-
fecti inter oves tuas à dextris a-
liquando numeremur. Eum in
finem Deus pacis, qui eduxit
de mortuis Pastorem magnum
ovium in sanguine testamenti
æterni, Dominum nostrū JE-
SUM Christum, aptet nos in
omni bono, ut faciamus ejus
voluntatem, faciens in nobis,
quod placeat coram se per JE-
SUM

SUM Christum, cui est gloria
in sæcula sæculorum.

P A X.

Domine JESU Christe! Pa-
ter futuri sæculi, Princeps
pacis: hanc enim nobis bene-
ficio passionis, & mortis tuæ
comparâsti, reconcilians nos
Patri per crucem, interficiens
inimicitias in temetipso. Tuo
interveniente merito miseri-
cordia & veritas obiaverunt fi-
bi, justitia, & pax osculata sunt.
Per te facta, & stabilita est pax
Deum inter & hominem; Hinc
jure ab Apostolo vocaris, Pax
nostra, evangelizans pacē his,
qui longè, & pacem ijs, qui
pro-


propè. Vix natus eras, annun-
tiata est pax hominibus bonæ
voluntatis. Quis mihi det fie-
ri participē illius pacis? Tu no-
sti Domine, quantum me tur-
bent concupiscentiæ, quæ mi-
litant in membris meis. Tu ve-
nisti adversus illas, non pacem
mittere, sed gladium. Dona
mihi hunc gladiū spiritus, quo
facta carnis mortificem, & o-
mnes inordinatos appetitus re-
scindam: ut veram animi pacē
inveniam; Et hanc in me auge-
ri, & confirmari desidero, quo-
ties te mi JESU in Eucharistia
recipio. Quid enim illa est ali-
ud, quam Sacramentum pacis,

& unionis? quo sicut grana tritici unus panis, ita credentium multitudo fit cor unum, & anima una, imò unū Corpus Christi; cuius omnia, & singula membra velis ab omni schismate præservare, uno autem mutæ charitatis spiritu animare, & fovere. Ego interim specialiter mi JESU minimum corporis tui membrum, peto singulare auxilium gratiæ tuæ; ut tibi, & Ecclesiæ tuæ constanter adhærens corde & ore fidē meam confitear, & bonum semper operer, nam gloria, & honor, & pax omni operanti bonum. Deinde, ut mandata tua
custo-

custodiam: quia pax multa diligentibus legē tuam. Deniq; , ut in bono ad finem usq; perseverans, in pace in idipsum dormiam, & requiescam.

R A D I X.

Flli Dei vivi, Radix, & genus David Apoc. 22. quā Deus quidem, Creator Davidis, & Dominus; sed quā homo; è stirpe David proveniens, quā Deus & homo Radix omniū fidelium. Gaudeo in te, velut in virtute infinita omnes omniū rerum naturalium perfectiones modo contineri perfectissimo: ex te enim vim & efficaciam suam hauriunt semina frugum, &



herbarum, radices plantarū & arborū; omnis germinū, florū, fructuūq; varietas, pulchritudo suavitas ex te prima omnī radice nascitur. Proinde & in te, quidquid inde laudis vel concipi potest, refundi debet. Benedicite igitur universa germinantia in terra Dominum, ligna fructifera & omnes cedri laudate & superexaltate eum in sæcula, & unā mecum eidem gratias agite: quod virtutes rerum tam mirabiles propter hominem creaverit. Sed quis tibi gratias mi JESU! referre poterit; quod Radix salutis nostræ esse volueris, tantopere olim expe-

expectata? de te enim Isaias
scripsit: Ascendet sicut Virgultum
coram eo, & sicut Radix
de terra sitienti, hoc est, de
progenie patrum tanto desiderio
ad Messiam anhelantium.
O Radix JESSE! ex te originem
suam ducunt omnes, quæ naturam
excedunt, perfectiones: tibi
virorem suum perpetuum
adscribere debent Virgines, flores
virtutum suarum Confessores,
fructus bonorum operum Martyres,
veræ religionis propagationem
Zelatores animarum. Quis
mihi det ô JESU! ut tibi per fidem
firmissime insertus sim &
maneam: desidero enim ita esse fun-

se fundatus & radicans in charitate Dei, ut me nihil unquā separet à Deo meo. Unum est detestabile peccatū, quō, ne à te avellar, timeo. Et quidni timerem? cum tot rami, & quidē tam nobiles avulsi sint, monente insuper Apostolo: non tu radicem portas, sed radix te. Ita est mi JESU! tu portas me, & sustines usq; huc ramum inutilem, & cariosū. O quā bonus es & patiens! quod à dæmone vel concupiscentia me avelli non permiseris. Et ne quid tale contingat, cupio sēper, & præsertim beneficio cōmunionis te in me & me in te
man-

manere: ut sicut ex radice succum suum arbor, ita & anima mea ex te spiritū, & vitam, alimentum, & vires suas hauriat; atq; ita fiam, sicut lignū, quod plantatum est juxta decursus aquarum, quod det fructum in tempore suo; cum certa spe, me aliquando post mortem inferendum ligno vitæ, quod est in medio paradisi.

V I T I S.

Verba tua sunt ô JESU! Ego sum Vitis vera; ut enim palmitem haberes ejusdem tecum naturæ, homo fieri dignatus es; nec tantam virtutē palmiti præstare posses, nisi Deus esses

esses. Et quæ hæc bonitas tua,
mi Deus quod nos vilissimos
stipites, quasi palmites tibi in-
sertos esse cupias? ô quàm mi-
rabilis, & divina Vitis es! sic
enim de te ais apud Siracidem.
Ego quasi vitis fructificavi sua-
vitatem odoris, & flores mei
fructus honoris, & honestatis.
Heu quàm viles mei flores, quã
putridi fructus, amore proprio
infecti, Doleo mi Deus & hu-
militer veniam rogo, ignosce
negligentiæ meæ, quod expecta-
tioni tuæ non satisfecerim.
Quærunt me appetitus mei ab-
strahere à te, timeo mihi Do-
mine, vim patior subinde, re-
spon-

sponde pro me & protege me.
 Quæ utilitas in sanguine tuo; si
 sicut palmes foris mittar, &
 arescam, in ignem mittar, &
 ardeam? Calamū quassatū non
 conteres, & lignum fumigans
 non extingves. Fateor, multi in
 me humores vitiosi, à quibus
 liberari desidero: ut fructus fe-
 ram incorruptos. In te mane-
 re mihi necesse est. ô JESU nō
 enim potest palmes ferre fructū
 à semetipso, nisi manserit invi-
 te, quare gratia tua præcedat,
 concomitetur & subsequatur o-
 mnes actiones meas. Recordar-
 e quæso Domine JESU quo-
 modo rogaveris Patrem tuum:

ut


ut unum essemus. Nihil potest mihi esse optabilius, quàm ut unus tecum sim, ita; ut de carne, sanguine, vita, spiritu, meritis, & gratia tua vivens pulchros virtutũ flores, & fructus proferam. Non deficiat in me vivificus ille succus, quo tui palmites imbuuntur. Et hunc succũ specialiter à te peto Spiritus S. ut omnes & singula facultates animæ meæ in Dei servitio alacriores fiant. Deniq; tibi supplico cælestis Pater! Agricola noster, qui omnem palmitem ferentẽ purgas: ut fructum plus afferat. Non parce mihi, ubi opus est, liga, adstringe,

ge, amputa, quæ noxia sunt, & superflua. Ad eum finem dona mihi patientiam, & subjectionem spiritus, adauge fidem, & fiduciam, intende charitatem, quæ me constanter Christo Filio tuo in hac, & post hanc vitam conjungat.

O L I V A.

Salvator mundi! vix eras in mundum natus, florebas quasi oliva speciosa in cæpitis; & dū incidereris octavo die, olivam uberem, pulchram, fructiferā, speciosam vocavit Dominus nomen tuum. Sine tua gratia humanum genus, velut arbor inutilis fuisset excisa, & à facie Domi-

Domini projecta. Oleaster erat
vetus homo, & tamen (quæ tua
est ô Salvator! benignitas, &
misericordia) socius factus es ra-
dicis & pinguedinis olivæ. Hæc
eandem gratiam omnes conse-
cuti sumus Christiani, dum ex
naturalis oleastro excisi, contra
naturam inserti sumus per ba-
ptismū in bonā olivā. Pro quo
singulari beneficio te, mi Deus
ab omnibus Christianis amari,
benedici, & æternum glorifica-
ri desidero, ex toto corde repe-
tens cum Davide: Confitemini
Domino, quoniā bonus; quo-
niam in æternum misericordia
ejus; quam nobis significat no-
men



men tuū, quod est CHRISTUS;
sicut enim ipse unctus es uncti
one plenissima, ipsius adeo di-
vinitatis; ita & nos pro capaci-
tate nostra vis esse unctionis
tuæ participes. Quidquid in te,
& circa te est, mi Jesu spirat
misericordiam, suavitatem, &
clementiam. Thronus tuus de
lignis olivarum, eloquiū tuum
super mel, & favum, oleū effu-
sum nomen tuum. Hoc oleo
inungi desidero animam meam
& omnes ejus vires con-
fortari, ut tanquā fortis Athle-
ta certare possim contra adver-
sarios salutis meæ, & eosdē vin-
cere. Grata tibi ô cælestis Pa-
ter

ter in testamento veteri fuit oblatio, simila frixa oleo. Sed modò nullum mundius, suaviusq; tibi sacrificium esse potest, quàm Filius tuus, quem, dum in communione suscipio, instar cœlestis olei cordi meo illabi desidero, ut floream, vigeamq; sicut oliva fructifera in domo Domini. Condimento ejusdē olei tui ô Christe perfundatur memoria mea, illumine-
tur intellectus, voluntas accendatur, ut participem aliquando de oleo lætitiæ, quo unxit te Deus, Deus tuus præ confortibus tuis, quos inter & me digneris recensere, ut te cum ijs
æter-

F O N S.

Auent

fluent aquæ vivæ. Apud te mi
Salvator! Fons est vitæ, omni-
um gratiarũ, & virtutũ. Ego
ingenuè fateor, totum esse me-
um, & si quæ bona habeo, o-
mnia & singula, fluxu prorsus
gratuito, & liberali manasse ex
te fonte bonorũ omniũ & na-
turalium, supernaturalium, tẽ-
poralium, æternorum. In hunc
fontem cum corpore & animo
me totum immergo: ut à cun-
ctis imūditijs præteritis ablu-
ar, & à futuris præserver. Eun-
dem in finem simul peto, cum
me æstus concupiscentiæ soli-
citet, ut extinguat aut refrige-
ret saltem hunc periculosum
æstum

æstum aqua illa viva, quæ manat de fonte isto; & sic cum minori impedimento corporis. & majori libertate spiritus tibi valeam deservire. Quanto mihi solatio sunt verba tua, mi JESU! si quis sitit, veniat ad me, & bibat, aquam, quam ego dabo fiet in eo fons aquæ salientis in vitam æternam. Utinam hæc tua suavissima promissio in me toties impleatur, quoties te in Sacra Communionem recipio. Liceat mihi tunc saltem haurire aquas in gaudio de fontibus Salvatoris. Si vas, in quo hauriam, desideres, ecce cor meum; si impurum est, munda

H₂

si an-

si angustū nimis, dilata. Quàm doleo quod non habeam majorem sitim ad aquam illā salientem in vitam æternā? quemadmodum desiderat cervus ad fontes aquarum, ita desideret anima mea ad Deum fontem vivum, quando veniam, & apparebo ante faciem Dei! nihil potest in hoc mundo satiare appetitum meum. Satiabor, cum apparuerit gloria tua. In te sunt Deus vota mea. Exaudi me Domine.

P A R I E S.

Quam bonū est, confidere in Domino, in Deo salutari suo! Ego quidem vanitati simi-

similis factus sū, velut umbra
fugiens, aut vapor ad modicū
parens. Sed Deus adiutor me-
us, & sperabo in eum. Adver-
sus omnia pericula salutis meæ
loco parietis & clypei eris mi-
hi. O JESU? quam securus est,
qui tuo gaudet Præsidio. Quid
juvant turres & mœnia sine au-
xilio tuo mi Deus! nisi Do-
minus custodierit civitatē, fru-
stra vigilat, qui custodit eam.
Nonne fide eorum, qui in te
speraverunt, muri Jericho cor-
ruerunt? ita nihil difficile ijs,
qui in Deo confidunt. Nec ego
munitus gratia tua mi JESU!
timebo difficultates quascunq.

occurentes. In Deo meo transgrediar murum, Dominus protector meus, & cornu salutis meæ. Modò non impediant auxilium tuum mi Deus delicta mea: Quia tamen non vinci potest bonitas tua infinita peccatis nostris, confido, non denegandū mihi, quod olim Ierosolymæ, quamvis prævaricatorici, pollicitus es. Ero ei, ait Dominus, murus ignis in circuitu Zachar. 2. 5. quomodo terrebuntur, & fugient hostes mei, si murus mihi fueris, & quidem igneus, exurens in me, quidquid vitiosum est, & pravarum inclinationum, in
flam-

flammans cor meum puro amo-
re tui, & protegens in circuitu.
Nullibi extra te securus sum,
undiq; salutis discrimen. Esto
mihi in Deum protectorem, &
in locum munitum: ut saluum
me facias, præsertim in agone
vitæ meæ: tunc te mi JESU! fa-
cræ communionis beneficio
mihi præsentem habere deside-
ro, ut sis mihi murus aheneus
contra omnes malignos spiri-
tus, atq; ita salus mea, pretioso
sangvine tuo reparata, in tuto
collecetur.

A G N U S.

Domine JESU Christe! te ef-
se Agnum Dei, qui tollis

H4

pec-

peccata mundi, testatus est præ-
cursor tuus, ut scimus, quia ve-
rum est testimonium ejus: uti
& Evangelistæ tui Joannis, qui
te Agnum Dei ab origine mun-
di occisum fuisse ait, in omni-
bus enim sacrificijs antiquæ le-
gis præfiguratus fuisti; donec
venires ipse, teq; hostiam pro-
peccatis nostris offerres: im-
possibile enim erat, sanguine
taurorum, & hircorum auferri
peccata. Tu igitur ô JESV! es
Agnus ille, qui tollis peccata
mundi, offerens Deo pretium
superabundans redemptionis:
non enim corruptibilibus auro
vel argento redempti sumus;
sed

sed pretioso Sangvine, quasi agni immaculati. O cœlestis Pater quā possum tibi offerre gratiorem victimam, quam hunc Agnum, Filium tuum, in quo tibi benè complacuit? Avertat quæso divina mansuetudo Agni hujus à nobis omnem iram indignationis tuæ; asperge fuso eius cruore animas nostras: ut sicut olim Israelitas, ita & nos transeat Angelus percutiens, nec plaga mortis æternæ nos corripiat. Sed, quis nostrū dignè tibi ò cœlestis Agne gratari poterit? quod totus quantus es, in bonum nostrum velis cedere. Donas nobis merita tua,
& o-

& omnem justitiam tuam, quâ
contegatur nostra nuditas, la-
ctas nos verbo veritatis, carnē
tuam in cibum, & Sangvinem
in potum offers. In æternum sit
benedicta hæc charitas tua, quæ
insuper spem mihi facit; fore,
ut admittar aliquando ad nu-
ptias agni in cælis; quarum ar-
cha nostra in terris est sacra cō-
munio, in qua per fidem nobis
deponfaris, & in charitate con-
jungeris. Sed doleo, quòd ad
illam majori cum desiderio &
pietate non accedam. Parce
mi JESU! omnibus defectibus
& negligentijs meis. Digneris
me imposterum, quoties te in
cor

cor meum iū recepturus, ornare veste nuptiali: ut arrhabonem meum Eucharisticum sūmo in pretio semper habeam, ex toto corde diligam, & fideliter ad mortem usq; custodiam & sic post vitam hanc coniungi merear cœlesti choro dicentiū magnā: Dignus est Agnus, qui occisus est, accipere virtutem, & divinitatem, & sapientiam, & fortitudinem, & honorem, & gloriam, & benedictionem. Apocalyp̃. c. 5. v. 12.

VITULUS.

Fili Dei! holocaustis victimarū amplius non delectaris.
Cor contritū & humiliatū placet

cet tibi Deus! super vitulum novellum, cornua producentē & ungulas. Peto igitur illam gratiā à te: ut in nobis spiritus contribulatus gratū tibi semper offerat sacrificium; & ut exhibeamus corpora nostra hostiā viventem, sanctā, Deo placentē, rationabile obsequiū. In te mi Jesu! impletum est, quod jubetur Levit. 4. ut vitulus efferretur extra castra, & cremaretur: propter quod & Jesus, ut sanctificaret per suum sanguinē populū, extra portam passus est. Sanctifica igitur ô Jesu! animas nostras, & à cunctis maculis peccatorum emunda, excita

cita nos ad sanctā tui imitationē: ut simul exeamus ad te extra castra, improperiū crucis tecū portantes, & simul in ara cordis nostri sic immolantes Deo, ut peccatis mortui iustitiæ vivamus. Non placent tibi animalium victimæ, sed sacrificium laudis. Illud igitur ex toto corde per singulos dies tibi præstare desideramus per D. N. J. C. adhortante nos Apostolo tuo: Per Ipsum offeramus hostiam laudis semper Deo, id est, fructum labiorū, confitentiū nomini ejus. Ne tamen te labijs solum honoremus, & cor nostrum longē sit à te, non tantū reddi-

reddimus vitulos labiorū nostrorum: sed etiā cor nostrum, velut animā vocalis obsequij tibi deferimus. Et in eum finem cor mundū crea in nobis Deus! & spiritū rectum innova in visceribus nostris: ut perfectam laudis hostiā tibi immolemus. Sed quis ille amor tuus ô cælestis Pater! quod nos peccatores filios prodigos, qui nec meremur inter mercenarios tuos ob ingratitudinē nostram numerari, tam benignè in gratiam recipias, & insuper in Sacramentali convivio vitulum nobis saginatum apponas comedendum, carnē & sanguinē
Filiij

Filij tui? ô vos beati Angeli,
qui peccatorū pænitiā gaude-
tis, vices nostras supplete, Deo
Patri, & Filio ejus omniū no-
strum Regi pro nobis gratias
agite, perpetuam laudis sym-
phoniā intonate; & ut illam
vobiscū aliquando intonemus
concedat nobis Dominus o-
mnipotens. Amen.

L E O.

GRatias tibi ago Domine
Jesu! quòd mori dignatus
sis amore nostri. Fortis ut
mors dilectio tua. Et ideo
ex amoris, gratitudinis, & obe-
dientiæ debito, quoties com-
munico, mortem Domini an-
nuntia-

nuntiabo, donec veniat. Vicisti
Leo de tribu Juda, dū mortuus
es, mortē ipsam, infernū, & dæ-
monem. Tunc nos fideles vi-
vere incepimus, quando vivere
desijisti. Favū mellis in ore Le-
onis mortui Samson reperit. Et
nos Christiani ô Christe Jesu!
vitam æternam in morte tua tē-
porali invenimus. Tua passio,
nostra est refectio, tristitia, so-
lumen, captivitas, redemptio,
tui ad mortem condemnatio,
omnium nostrū absolutio. De
spinis tuis uvas colligimus, & de
tribulis ficus, tuā inopia ditesi-
mus, infirmitate tuā roboramur,
& hoc robur augeri in nobis pe-
to dum

dum ad mensam Eucharisticā
 accedimus, ut tanquam leones
 ignem spirantes ab illa mensa
 recedamus, facti diabolo terri-
 biles. Circuit ille tanquam leo
 rugiens quærens, quē devoret.
 Infidiatur animæ meæ per car-
 nis blanditiem, sicut catulus le-
 onis habitans in abditis. Ne tra-
 das bestiis animas confitentes
 tibi, salva me de ore leonis, &
 fac me participē illius victoriæ,
 quā de maligno spiritu retulisti
 ne illi horrendæ maledictioni
 aliquando involvar: ite male-
 dicti. Leo rugiet, quis non ti-
 mebit quàm terribilia sunt ver-
 ba tua mi Deus! apud Amos

Prophetā? Occurram eis quasi
ursa raptis catulis, consumā eos
ibi, quasi leo. Tremor & timor
venerunt super me, ne in furo-
re tuo aliquando arguas me,
quasi leo conterens omnia ossa
mea. Fateor mi Deus! non ti-
mui te, ut potui, & debui: nam
qui timet Dominū, nihil ne-
gligit. Innumeræ sunt neglien-
tiæ meæ in servitio tuo, pro qui-
bus nunc supplico majestati tuæ
ut illorū non reminiscaris tunc,
cū ad judiciū veneris. Sal-
va quæso animam meam à ru-
gientibus præparatis ad escam,
qui Daniele m è lacu leonū libe-
rasti; & dona mihi gratiā tuam
cum



cū spiritu fortitudinis, quo tā animo se, & constanter dæmonibus in fide resistā, & tentationibus quibuscunque superior evadam: ut cū sponsa illa Cant. 4. gloriosa dæmonū, & passionum victrice de cubilibus leonum, de montibus Pardorum ad cælestem coronam aliquando merear evocari.

PROPITIATOR

Benedictus Deus, & Pater Domini nostri Jesu Christi: quia fecit nobiscū misericordiā suam, in Filio mundum reconcilians sibi. O quanto nobis hoc est solatio! modò enim Advocatū habemus apud Patrē Christum

stū justū; & ipse est propitiatio
pro peccatis nostris, non pro
nostris autem tantū sed etiam
pro totius mundi. Et ideo cre-
do mi Jesu! te pro omnibus, e-
tiam reprobis esse mortuum.
Proinde tibi supplico mi DEUS!
pro omniū salute: ut fructū Do-
minicæ passionis tuæ partici-
pent. Lex antiqua aureum in
tabernaculo fæderis habebat
propitiatorium, quo Arca tege-
batur. Longè excellentius no-
bis est propitiatoriū in Altaris
tabernaculo, quō non solū ope-
riuntur legis prævaricationes;
sed tolluntur etiam, & penitus
delentur. Credo enim Deum
homi-

hominibus fieri propitiū, non per hoc tantū, quod non imputetur eis iniquitas; sed per gratiā, quā de plenitudine Christi accipimus, & charitatē Dei diffusam in cordibus nostris per Spiritum S. Ideoque pro mea, & aliorum justificatione peto à te mi Salvator ut beneficio gratiæ tuæ induamus novū hominem; qui secundum Deū creatus est in justitia, & sanctitate veritatis. Præterea superabundans fuit propitiatio tua mi Jesu ! ubi abundavit delictum, superabundavit gratia. Hinc audacter dico cum Vate regio: Propitiaberis peccato meo ,

multum est enim, non solū per propitiationem facti sumus non inimici, sed etiam filij, & hæredes Dei, cohæredes autē Christi. Illumina oculos nostros Domine JESU! ut hanc singularē gratiam, & dignitatē agnoscamus, & te semper, dū vivimus, nobis propitium habere studeamus. Eum in finem cū Publicano dicā sæpius: Deus propitius esto mihi peccatori, & orabo cum Ecclesia; propitius esto parce nobis Domine, propitius esto, exaudi nos Domine. Ab omni malo libera nos Domine, præsertim à malo finalis impenitentiae, & damnationis perpetuæ;

tuæ; Quis enim illud non timeat cum jubeamur, etiam de propitiato peccato non esse sine metu. Quare cū adjutorio gratiæ tuæ mi Deus! per bona opera vocationem meā certā facere non desinā: ut mihi misericors & propitius usq̃, ad mortē, donum perseverantiæ gratuitum largiaris. Amen.

V E R B U M.

O Verbum Patris ineffabile! generationem tuam quis enarrabit: Quomodo scilicet ab æterno Pater te verbum suum produxerit, persona distinctum idem in natura. A.A.A. Domine nescio loqui. Mysteriū

illud credo quidem; sed non intelligo. Hoc tamen scio: quia Verbum illud infinita est sapientia, ratio perpetua, intellectus incomprehensibilis, veritas invariabilis, lux indeficiens, illuminans omnē hominem venientem in hunc mundū. O cælestis Pater! verè cor tuum eructavit verbum bonum. Utinā & boni illius verbi gratia illaberetur in cor nostrū, quod heu dolor! nimis vanum, & terrenum est, ut ex verbis nostris palam est, quibus te Deum toties offendimus. Ignosce nobis ô Verbum Patris! & da nobis spiritum bonum, qui thesaurū
gra-

gratiæ tuæ nobis infūdat, & custodiat, & simul nos doceat, & faciat benè loqui, & vitare multiloquium. Semel locutus est Deus, ait Psalmista: quia unum solummodo Verbum ab æterno Pater genuit. Et unicū illud Verbum veneror cū Cherubinis, cum Dominationibus adoro, admiror cum Virtutibus cum Angelis, & Beatis omnibus summo, quo possum affectu benedico. Hoc Verbum, in principio erat, & apud Deum erat, & Deus erat Verbum, omnia per ipsum facta sunt. Et hæc omnia, quid aliud sunt mi Deus! quam locutiones tuæ ad

extra

extra, per quas invisibilia Divinitatis tuæ à creatura mundi intellecta conspiciuntur. Credo interim indubitatè ô cælestis Pater! Verbum tuum non esse inter ea, nec esse sicut ea, quæ facta sunt; sed natum à te ante omnia sæcula, genitum non factum. In virtute ejusdē verbi, quod cælum & terrā è nihilo creavit, credo certissimè transubstantiationem fieri in Eucharistia, in qua dum te mi JESU! recipio, fac me inæstimabiles thesauros sapientiæ, & scientiæ tuæ magis cognoscere, æstimare, & concupiscere: concupiscentia enim sapientiæ deducit
ad

ad regnū perpetuum. Summas quoq; gratias tibi ago ô Verbum incarnatum! quod eructaveris abscondita à constitutione mūdi, in parabolis os tuum aperueris, & omnia nobis nota feceris, quæ audivisti à Patre tuo. Illam gratiam à te peto, ut quoniā semen est verbum Dei, cor meum terra bona sit, & aptè disposita ad recipienda verba Evangelij tui, ita, ut illa in corde bono, & optimo audiens retineam, & fructum afferam in patientia.

H O M O.

Quid est Homo ô Fili Dei!
aut Filius hominis: quia vi-
fitas

fitas cum, in similitudinē hominum factus, & habitu inventus ut homo? Quid, quæso, movere te potuit, ut fieres caro, & sanguis noster? Una, & sola est bonitas tua, quæ movit te. Doleo, quòd hanc bonitatem unquam offenderim, & detestor ex animo omnia, & singula peccata mea, ideo tantum: quia infinitæ illi bonitati contraria. Moveat, & illa me ad redamandum te mi JESU; cum & ideo fieri homo volueris: ut similitudo mater fieret majoris charitatis. Si omne animal diligit sibi simile, quomodo possū ego homo, te Deum hominē non ama-

amare? Impedit tamen in me
 amorē illum Philautia, & ideò
 tantus tepor meus in ritè præ-
 stando tibi servitio. Ignosce
 Domine Jesu! ignem venisti
 in terram mittere, & quid vis,
 nisi, ut accendatur, accende il-
 lum in me? præsertim, dū mi-
 hi conjungeris per communio-
 nem, in quâ verè ostendis, de-
 licias tuas esse cum filiis homi-
 num: ut ad amorem tui reci-
 procum nos alliceres. Habe
 cor meū ô Jesu! ut, quam sua-
 vis sis, gustem magis, & vi-
 deam, quam grandis fuerit illa
 misericordia tua, quâ permo-
 tus non Angelos, sed semen A-
 brahæ

brahæ apprehendisti. Videras fragilen naturam nostram, & quidem, totam, insuper à dæmone seductā cecidisse; & continere te non poteras: quin universali miseriæ succurreres. O verè mi Deus! miserationes tuæ super omnia opera tua. Misericordiæ Domini, quòd non simus consumpti. Poteras gratis salvare hominem. Sed quòd homo fias, ut salves hominē; & Filius hominis: ut hominē facias Filium Dei, excessus nimis est bonitatis tuæ. Pro quo mi JESU! cum toto humano genere, ad pedes tuos sacratissimos provolutus, summas tibi grati-

gratias ago, & vos beatos Angelos (neq: enim invidetis nobis fortunam nostrā) simul exposco: ut nobiscum magnificetis redemptorem JESUM, & exaltetis nomē ejus in idipsum. Illam interim gratiam à te peto ô Christe: ut exemplum illud quod nobis in assumpta humanitate monstrāsti, strenuè imitemur; Nam & ideo apparuit humanitas, & benignitas tua; ut erudiret nos. Proinde simul efficax auxilium gratiæ tuæ flagito pro incremento doctrinæ tuæ, ut abnegantes sæcularia desideria sobriè, piè, & justè vivamus in hoc sæculo, expectantes

tes beatam spem, & adventum
gloriæ tuæ.

R E T E.

Quid potuisti Domine Jesu
facere, quod non feceris:
ut hominē caperes, & ad amo-
rem tui traheres? Nonne omnia
per te ipsum facta sunt; & quid
sunt hæc, nisi retia, quæ ideo
explicas; ut corda hominū ve-
neris. O felix præda! quæ à te
mi Jesu! capitur: non enim ca-
pis, ut pereat, sed ut vitam ha-
beat, & abundantius habeat.
Proinde summas tibi gratias
ago pro illis beneficijs, quibus
omnes peccatores, sagenâ tuâ
Evangelicâ captos unquam cu-
mula-

mulasti. Captivis libertatem,
mortuis vitam, miseris æternā
felicitatem contulisti. Ne quæ-
so! obliviscaris mei O JESU! vel
tibi debebo in prædam cedere,
vel diabolo. Libera me de la-
queo venantium, & ab insidijs
quærentium animā meam. Vo-
cas me; sed hoc non satis mihi
est: Trahe me post te, & currā
in odorem unguentorum tu-
orum. Fateor quidem, multa
neglexi media, quibus me di-
gnatus es allicere; sed veniam
rogo suppliciter; ne me ideo
desinas attrahere, qui pondere
infirmittatis meæ semper deor-
sum premor. Non possum non

K

sum-

summam in te habere fiduciam
dum confidero omnia illa irri-
tamenta, quæ non minus svavi-
ter, quàm potenter nos ad te
invitant, & adducunt. Elo-
loquia tua dulciora super mel,
& favum. Non persvades nisi
credere, nec præcipis, nisi a-
mare. Quid facilius, quam Deo
credere? quid dulcius, quam
ipsum amare? Nulla tamen no-
bilioresca, quam caro, & san-
guis tuus sub specie panis tectus
Totum cor meum divino hoc
ferculo inescari desidero, & cæ-
lesti affectu ita imbui: ut gau-
deam me ligari, & constringi
præceptis tuis: vincula enim il-
lorum

lorum alligatura salutaris. Sed
vanum est hoc desiderium me-
um, nisi & tu me traxeris ô cœ-
lestis Pater! per Filium tuum,
in quo impletum est, quod O-
seæ c. ii promissisti: in funiculis
Adam traham vos, in vinculis
charitatis. In funiculis scilicet
Adami novi, & cœlestis, per
quem nos tibi maximè devin-
xisti: quid enim aliud eius na-
tivitas, & vita, passio, & mors,
resurrectio, & ascensio, quàm
amoris vincula? quibus tam fir-
miter irretiri cupio voluntatē
meam: ut nihil me à te Deo Pa-
tre meo, & Filio tuo possit se-
parare.

L A P I S.

Domine JESU Christe! in te impleta est Prophetia Isaiaë & promissio à Deo Patre facta: Ecce ego mittā in fundamentis Sion lapidem, lapidem probatum, angularem, pretiosum, in fundamento fundatum. Verè lapis probatus es mi JESU! tentatus per omnia pro similitudine absq; peccato. Quod contusiones, ictus, & percussiones tolerasti? foderunt manus tuas, & pedes tuos. Doleo mi JESU! ex toto corde meo; quòd unquā peccaverim, & peccando author fuerim passionis tuæ; sed eidem tamen etiam maximas

mas gratias habere de teo: cum enim merito, & beneficio passionis tuæ muri cælestis Jerusalem reparati sint, spero me illis tanquam lapidem vivū aliquando inferendū. Fateor quidem, multa adhuc in me sunt rudia, superflua, & inordinata; ad hæc verò tollenda largire mihi gratiam tuam ô Salvator! imprimis tempore communionis; tunc digneris me adaptare regno cælorum; ut quæ in me exerior noxia mortificem, ab alijs etiam mortificari, corrigiq; libenter feram, libererque impedimentis omnibus, quominus ad cœleste quadrem ædi-

ficiū. Præterea mi Jesu! tu es lapis ille vivus, à Deo electus, & honorificatus, in quo omnis ædificatio constructa crescit in templum sanctum in Domino. Lapis ille, qui de monte abscissus es sine manibus. Lapis ille, in quo Zacharias septem oculos se vidisse testatur, in commendationem summi amoris, & vigilantiaæ tuæ in salutē nostram. Utinam & amor meus in te semper esset vigilans; omnis labor & vigilia mea in tui amore consummatur. Tu es Lapis ille, quē reprobaverūt ædificantes, sed factus in caput anguli duos populos, Judæū, & Gen-

Gentilem inter se concifiasti, faciens utraq; unum, & medium parietem maceriæ solvens; ita ut modò cunctis omnino hominibus aditus ad cœlum pateat. Quam multi adhuc extra illam unionem sunt Judæi, Gētiles & Hæretici. Miserere illorum omnium ô cœlestis Pater! qui potes etiam de lapidibus suscitare filios Abrahæ. Mille operarios in messem tuam, in ædificationem Corporis Christi, donec occuramus omnes in unitatem fidei, & agnitionis Filij Dei. Tu deniq; mi IESU! ille Lapis es pretiosissimus, à quo omnes lapides pretiosi in
funda

fundamentis cælestis Jerufalem
 & omnes margaritæ in portis
 ejus suum decus, splendore &
 pretium mutuuntur. Et ego or-
 natum meum spirituale a te
 mutuari desidero, dū te in cor
 meum recipio: ut certior fiam
 cælestis incolatus, & in eodem
 cum Sanctis tuis omnibus lau-
 des tuas æternum merear de-
 cantare,

D O M U S.

Quæ est domus tua ô Verbū
 Patris! nonne assumpta hu-
 manitas; quam plenitudo Divi-
 nitatis inhabitat. Verè domum
 tuam decet sanctitudo Domi-
 ne cum fundamentum illius &
 suppo-

suppositum sit ipsa sanctitas infinita, quam summa cum submissione, & pietate veneror, & simul omnes Sanctos invito ad offerendas laudes, & agendas tibi gratias ô Fili Dei vivi! quod naturam nostram ad summum dignitatis fastigiũ elevâris: ita, ut eandem etiam patriæ cultu volueris adorari. Et hinc bene à Psalmista monemur: adore scabellum pedum ejus quoniã sanctum est. Quare & ego Domine Deus! adoro, & adorabo ad templum sanctum tuum, & confitebor nomini tuo. Templum inquã illud adoro, quod crudeli judæorum perfidiã destruo.

structum fuit; sed triduo reædificatum, in resurrectione scilicet, quam ego firmissimè credo confidoq; per infinita merita tua mi Iesu! si terrestris domus nostra hujus habitationis dissolvatur; quod ædificationē ex Deo habeamus, non manufactam, æternam in cælis. Attamen jure timeo, ne mihi impedimento sit illud ipsum domicilium, quod spiritus meus inhabitat. Circuit illud dæmon, & insidiatur undiq; . Non solum mors per fenestras tentat ingredi, sed per omnes sensus. Sed, qui habitat in adjutorio Altissimi, in protectione Dei cæli

cæli commorabitur. Humanitas Salvatoris mei est, & erit mihi in adiutorium, & in domum refugij. Et quidē in triclinium sit mihi ô Iesu! anima tua; illa reficiat memoriã meã continua recordatione beneficiorum tuorum, pascat intellectum meum suavi cibo veritatis Evangelicæ, & voluntatem meam divini amoris vino inebriet. In musæũ sint mihi vulnera manuum tuarum, in quibus descripsisti me: ut indies magis in timore Domini proficiam. In cubile sint mihi vulnera pedum tuorum, & ut in illis suaviter dormiam, & requiescam

esam, fac, ut cor meum obli-
viscat temporalium, ut ma-
jori cœlestium desiderio affici-
atur. In sacellum deniq; sit mi-
hi vulnus lateris tui, & in eo-
dem adoro cor tuum ô JESU!
è quo velut altari sacratissimo
divina ardentissimi amoris thy-
miamata ascendunt, in odorẽ
suavissimũ Domino. Quæ tibi
ô cœlestis Pater offero in sup-
plementum teporis nostri, &
frigoris, rogoq; suppliciter: ut
quidquid in nobis est terreni a-
moris, & sordidi, deleatur; pu-
rus verò ignis perfectæ chari-
tatis in Deum & proximũ ex-
citetur & foveatur; & sic præ-
pare-

paremur in domū Domini, & in templum Dei, vivi, & in nobis impleatur, quod promissū est Levitici c. 26. quoniam inhabitabo in illis, & inambulabo, & ero illorum Deus. Hoc saltē peto a te mi Jesu: ut quoties te in domum cordis mei recipio, me totum inhabites, possideas, & sic confirmes in gratia tua: ut mansionem aliquam in domo Patris tui inveniam,

O M N I A:

O Cælestis Pater! summas tibi gratias ago pro inenarrabili dono, Filio tuo unigenito: ipsum enim donando omnia nobis

nobis cum ipso donasti. Non potuit quidquā excellentius vel cogitare sapientia tua, vel nobis gratius omnipotentia tua producere. Venerunt nobis omnia bona pariter cum eo, & innumerabilis honestas per manus illius. Proinde, sicut omnia flumina ex mari veniunt, & in idem refluunt, ita desidero, ut omnia illa naturæ & gratiæ dona, quæ à te per Filium in nos fluxerunt, in te per eundem cū perenni laude & gloria bonitatis tuæ refluant. Dignus es Domine, qui ab omnibus super omnia amēris, & benedicaris. Et tu pariter Fili Dei vivi, qui inter

inter omnia, quæ fecisti, omni-
um compendium fieri dignatus
es: ut, nobis omnia fieres. In
nomine tuo omne genu flecta-
tur cælestium, terrestrium, &
infernorum, & omnis lingua
confiteatur nomini tuo in æter-
num: omnibus enim omnia fa-
ctus es, ut omnes lucrifaceres.
Encyclopædia ignorantibus,
panacea ægrotis, panoplia in-
ermibus. Formā debitoris, ser-
vi, infantis, viri, hortulani, pe-
regrini, imò speciem peccato-
ris dignatus es assumere: ut o-
mnium salus fores. Verus Pastor
noster. Nihil extra te mi JESU
satiare potest spiritum meum.

Si

Si donares mihi omnia sine te,
dares mundum sine sole, cor-
pus sine anima. Tolle à me
omnia, quæ habeo, & relinque
te solum mihi & sufficit, quia
tu solus es beatitudo mea. V-
bi tu es, ibi bona omnia, &
quia amicus noster esse digna-
tus es, illa nobis tecū volui-
sti esse communia. Verè ni-
mis magna est charitas tua,
mi JESU! & confundit illa pe-
nitentiam nimiam ingratitudinem me-
am: difficile enim mihi accidit-
vel modico subinde bono care-
re, amore tui. Cùm deberem
cum Apostolo omnia arbitrari
ut stercora, ut te Deum meum, in
quo

quo omnia humani cordis desiderabilia superabundant, magis possem amare. Diligā te mi Jesu! super omnia, te inquam, qui, cum dives es, pauper fieri voluisti, & te exinanire, ut repleres nos bonis cælestibus. Da mihi spiritum paupertatis, ut paratus sim potius carere bonis omnibus, quā amicitia tuā, quā me fateor, ut decet, non observasse, nec amoris tuo respondisse. Parce Domine homuncioni ingratiſſimo, ignosce roganti veniam, quam licet non merer, spero tamen, & quidni sperem; cū dederis mihi omnia, & te ipsum super omnia. Proinde

L

& in

& in te Deo Salvatore meo gaudere æternum, & exultare desidero. Quid enim mihi est in cælo? & à te quid volui super terram? Deus cordis mei, & pars mea Deus in æternum.

CHRISTUS.

O Chris-te Fili Dei vivi! quē Spiritu S. unctum esse Scriptura testatur. Summas tibi gratias ago pro Sacramento Cōfirmationis, quo Chrysmate salutis inunctus, & in fide roboratus sum. Sicut unguentum in capite, quod descendit in oram vestimenti; ita & gratiæ tuæ in omnia Ecclesiæ membra summa, & minima dimanant: de
pleni-

plenitudine enim tua omnes accepimus. O quam suavis erat odor ille mi JESU! quē spirabas dum nobiscum in terra viveres. Quot millia hominum attrahebant exempla, miracula, & eloquia tua? Trahant nos & illa pariter ad te redamandum, & imitandum. O cælestis Pater? nullum laudis sacrificium tibi gratius redolere potest, quàm Filius tuus. Proinde eundem tibi cum summo affectu pietatis offerimus: ut in virtutum ejus fragrantia nos cælesti benedictione tuâ repleamur. Suscipe igitur omnem ejus charitatem, religionē, obedientiam, humi-

litate, paupertatem, misericordiam patientiam, cæterasq; virtutes ejus suavissimas. Verè odor Filij tui, sicut odor agri pleni, cui benedixit Dominus. Et quoties hunc agrum beneficio sacrae communionis ingredior non solum floribus gratiarum tuarum ornari, sed etiam de obtinendis aliquando fructibus æternæ gloriæ me certiores reddi desidero. Ingens sanè bonitas tua est, ô Christe! quod tam patienter feras abominabilem fætorem delictorum nostrorum, & putidum cordis nostri rectorum subire non horreas. Infunde quæso benignissime Samaritanæ

ritane vulneribus nostris vinum
charitatis, & oleū misericordiæ
tuæ; confirma, & perfice omnes
& singulas facultates animæ
meæ unguento S. Spiritus. In-
quā totus, quantus sum, bene-
dictionē tuā, sicut vestimentum
& intret, sicut aqua in interiora
cordis mei, & sicut oleū in ossi-
bus meis: ita, ut odor istius o-
lei cedat in æternam commen-
dationem miserationum tuarū
quæ à sæculo sunt, & in sæculū
sæculi.

J E S U S.

O JESU! esto mihi Jesus, &
salva me: ideo enim voca-
tum est nomen tuum JESUS, ut

L3

salvum

salvum faceres populum tuum
à peccatis eorum. Multa quidē
& magna sunt delicta nostra; sed
nomen tuum ô JESU nomen
est summæ misericordiæ pieta-
tis, & gratiæ: ita, ut de culpa-
rum venia dubitare non liceat.
Et ex hoc nomine tuo, quod sis
JESUS meus, multo mihi sva-
vior, charior, & pretiosior es,
quàm, quód sis Dominus, De-
us creator meus: nihil enim na-
sci nobis profuit, nisi redimi
profuisset. Revereor quidem,
& adoro sanctū & terribile no-
men tuū, Deus! sed amplector
cum svavio nomen JESU, &
cordi meo semper impressū es-

se desidero. Svavitas Nominis
tui ô Jesu! in me exerat virtutē
suam, intellectum meū pasciat
amorem excitet, nutriat pieta-
tem, vires meas confortet, ca-
stas affectiones foveat, & ita
spiritum meum possideat; ut
semper vegetus, & fortis sim ad
laborandum, & patiendū pro
gloria tua. Gaudeo mi JESU!
nomen, Tuum esse super omne
nomen & te pariter exaltatum
esse super omnes creaturas, Vi-
vit Dominus, & benedictus De-
us meus, & exaltetur Deus salu-
tis meæ. Gaudeo ipsos dæmo-
nes vel ad sonum nominis tui
contremiscere. Quod mihi ma-

gno est solatio. In nomine tuo
spernā insurgentes in me. Utinā
magis & magis indies fiat à fo-
lis ortu usque ad occasum lau-
dabile nomen tuum. O cæle-
stis Pater! mirifica misericordi-
as: tuas ut omnes Gentiles, &
hæretici ad verā fidē unigeniti
Filiij tui convertantur: Non e-
nim misisti illū, ut judicet mū-
dum; sed, ut salvetur mundus
per ipsum, nec est in alio aliquo
salus, in quo oporteat nos sal-
vos fieri. Quare mi Jesu! in no-
mine tuo salvū me fac infidi-
antur mihi dæmones, fiat ma-
nus tua; ut salvet me. Caro, &
mundus quærunt me seducere;
sed

fed converte nos Deus, & ostē-
de faciē tuā, & salvi erimus.
Dirige me in veritate tua, &
doce me: quia tu es Deus Sal-
vator meus, cui sit honor, &
gloria cum Patre, & S. Spiritu
in sæcula sæculorū. Amen.

VARIÆ
ORATIONES

Ante, aut post Communionē
vel Sacrificium.

*Quotiescunq; enim manducabitis panem
hunc, mortem Domini annuntiabitis.*

1. Corinth. 11.

SCio mi JESU! quàm gratum
tibi sit, fieri memoriā passio-
nis tuæ; imprimis verò tempore
com-

communionis. Quare oblivioni detur dextera mea, si non vel tunc saltem meminero tui. Pone te, ô JESV Crucifixe! ut signaculum super cor meū; ut te ardentem, & constanter diligā, ut signaculum super brachium meū ut etiam ipso opere meum in te amorem contester. Et cū te modo præsentem habeā, Liceat mihi per omnia sacratissimi Corporis tui membra affectū cordis mei exprimere. Quare veneror mi JESU! & adoro Verticē tuū, spineā corona circū datū, oculos lachrimis irriguos & velatos, aures contumelijs saturatas, genas percussas alapis

os



os sputis foedatum, linguam felle, & aceto potatam, humeros crucis pondere gravatos, brachia violenter extensa, & manus clavis perforatas. Veneror, & adoro mi Jesu! tergū tuum imò totum corpus tuum flagris dirè laceratum, pectus tuū summis plenum angustijs, & afflictum usq; ad mortem, latus lanceâ perforatum, genua toties in precibus incurvata, pedes lassatos, & ferro pertusos. Omnia denique & singula Corporis tui membra iterum, iterumque veneror, & adoro, summasque gratias ago pro omnibus, & singulis doloribus, & cruciatibus

amo-

amore nostri toleratis. Et quia ego sæpius abusus sum membris meis, & te Deum meū offendi. Offero tibi ô cælestis Pater! omnes illas afflictiones, & pænas, quas pro culpis nostris Filius tuus in suis quinque sensibus pertulit, humiliter rogans: ut mortificationem quoque D.N. J.C. in corpore nostro jugiter circumferamus.

CruX tua sit mihi Scala Jacob quia per illius gradus, h. e. obedientiam, & humilitatem, patientiā, & charitatem ad cœlū desidero conscendere. Trahe me post te ô Jesu! & perface desiderium bonæ voluntatis meæ.

San-

Sanguis tuus sit mihi & Jesu
balneū, in quod totum me im-
mergo: à capite enim usque ad
calcē non est in me sanitas. Sit
mihi oleum, quo ungantur, &
curentur vulnera mea. Sit re-
frigerium malè æstuantis con-
cupiscentiæ, & incentivum te-
pidi spiritus, ut meus in te amor
nunquam refrigescat.

Corpus tuū Domine Jesu!
quasi piscina probatica quinque
habens porticus. Multis ego in-
firmitatibus afflictus sum; nec
hominem habeo, præter te, qui
sanare me possit. Proin instan-
ter peto: ut saltem, quando mo-
tus est aquæ salutaris, tempore
scili-

scilicet communionis, quo te in me recipio, ego vicissim per tua quinque vulnera immitar in te, & recipiar: ut totus sanus fiam.

Omne animal per ostium laterale Arcam Noe ingressum non periit; sed vivum remansit. Et mihi salutis ostium est latus tuum ô JESV! apertum. Illud modò in spiritu ingredior. Hic latere cupio securus à communi interitu. Hic cor tuum invenio fontē omnis vitæ in quē demergo cor meū: ut in vitā æternā custodiatur.

Sit denique fasciculus myrrhæ dilectus meus mihi: inter ubera

ubera mea commorabitur: intellectu enim & voluntate meâ tam arctè complecti desidero JESVM meū crucifixū: ut nec ipsa morte valem separari.

GRATIARVM ACTIO.

Benedic anima Domino, & omnia, quæ intra me sunt nomini sancto ejus: quia fecit mihi magna, qui potens est, & sanctum nomen ejus. Memoriam fecit mirabilium suorum misericors, & miserator Dominus, escam dedit timentibus se. Propterea confitebor tibi Domine Deus meus! in toto corde meo, & glorificabo nomen tuū in æternū, & laudabo magnificentiā

centiā gloriæ Sanctitatis tuæ, &
memoriā abundantiae suavitatis
tuæ: quia bonitatem fecisti cū
servo tuo. Venite audite, &
narrabo omnes, qui timetis De-
um, quanta fecit animæ meæ.
In loco pascuæ, ubi cibus & po-
tus, est Caro & Sangvis Jesu
Christi, ibi me collocavit, su-
per aquā refectiōis educavit
me, animā meam convertit,
impingvavit in oleo caput me-
um, & calix meus inebrians quā
præclarus est. Quid est homo,
quod memor es ejus, aut Filiij
hominis, quia reputas cū Nun-
quid ego totus in peccatis natus
sum, & substantia mea tanquā
nihi

nihilum ante te; & dignum ducis, super hujusmodi aperire oculos tuos, & adducere eum tecum in conviviū? O quā bonus Deus Israel his, qui recto sunt corde! quā magna multitudo dulcedinis tuæ, quā abscondisti timentibus te. Gustate & videte: quoniam s̄vavis est Dominus, beatus vir, qui sperat in eo. Confiteantur Domino misericordiæ æjus, & mirabilia ejus filiis hominum: quia satiavit animam inanē, & animam esurientem satiavit bonis. Panem Angelorum manducavit homo: Propterea benedicam Dominum in omni pempore ut

M

pla-

placeam coram Deo in lumine
viventium, & inhabitem in do-
mo Domini in longitudinem
dierum.

ORATIO

Ad Christum per 8. Beati-
tudinis.

Adoro te Domine JESU Chri-
ste submisissimè cum Bea-
tis illis, qui sunt pauperes spiri-
tu, & gratias tibi ago: quòd pro-
pter nos egenus factus sis: & tuâ
inopiâ ditaremur. Fac me humi-
lè corde, & pauperè spiritu, ut
spirituales tuas divitias & copi-
osiùs accipere valeam, & securi-
ùs conservare.

Gaudeo mitissime Jesu! quod
digna-

dignatus sis venire ad me terrā
silvestrem, inanem & vacuam.
Posside me totum, & mansue-
tudinis tuæ oleo perfunde: ut fe-
ris passionum mitigatis, terra
cordis mei fructus tibi gratos,
& mihi salutares constanter
ferat.

Prosterno me corā te mi Je-
su! cū pænitentibus, qui lugent
peccata suā: fac me participem
illius luctus; ut te contrito, &
mundo corde semper recipiens
Ægypti delicias fastidiam; man-
na verò spiritualium consolati-
onū ad promptius serviendū tibi
& aliis propter te, degustare
merear.

M₂

Ignor-

Ignosce Domine Jesu! quod tam modica sit in me esuries, & sitis justitiæ. Rogo te per desiderium illud, quo te ipsum nobis in cibum dare desiderasti; Dona mihi gratiã: ut sobriè, justè vivendo implere possim omnem justitiã in hac vita, post hanc verò gloriã tuã merear satiari.

O quæ viscera misericordiæ tuæ Pater sancte! in quibus visitavit nos oriens ex alto. Minor ego sum omnibus miserationibus, ex quibus conflatus sum totus, & quomodo possum non esse misericors? O pie Jesu! fac me participem charitatis tuæ: ut gaudio mihi sit, amore tui
mise-



misericordiam aliis, si quam
possim, exhibere.

Confundor mi Jesu! quod sta-
bulum cordis mei subire non
horreas. Parce negligētiæ meæ
& munda me totū ab omni in-
quinamento carnis, & spiritus
in sanguine tuo: ut sicut à me
jam per speculum in ænigmate,
ita revelata tandem facie æter-
num videaris.

Fili Dei, Princeps pacis gra-
tias tibi ago, quòd dederis po-
testatem recipientibus te, filios
Dei fieri; & cū tales debeant es-
se pacifici, doleo, si quā dissidij
aut turbationis causam unquā
dederim. Libera me ab omni

M3

inqui-

inquieto spiritu: ut in bona pace tecū, mecū, & cum proximo semper vivam. Fructū verò adoptionis in cælo recipiam.

Benedicta sit in æternū charitas illa tua ô Christe! qua tot persecutiones pateris etiam in Venerabili Sacramento. Esto robur infirmitatis meæ: Sine te enim non possum quidquā mali propter justitiam pati. Juva me quæso! in gravioribus præsertim tentationibus; ne regno cælorū priver. O si verè agnoscerem, qualis sit gratia, & dignitas, pati propter te, mi JESU.

O SACRUM CONVIVIUM

Ignosce mihi peccatori ô Jesu
quòd

quod te fontē omnis Sanctitatis
sumere præsumpserim. Sancti-
fica spiritū meū, in nomine tuo
ut tibi cum Patre tuo in eodem
jugis sit mansio; corpus verò
immaculatū serva, ut stabile tē-
plum sit Spiritus Sancti.

O Convivium divinum, quod
tu, ô cælestis Pater! in Filio tuo
nobis adornasti. Ego ex toto
corde meo cū eodem Filio tuo
elevatis in cælū oculis ad te De-
um Patrem omnipotentē, tibi
gratias ago pro summa charita-
te illa; & cū me referendis gra-
tiis imparē agnoscam, omnes
Choros cælestes invoco, ut pro
me æternū benedicant nomini

M4

tuo.

tuo. Opto interim sacro hoc convivio sic inescari animam meā: ut indies magis & magis divini amoris dulcedinē merear degustare.

In quo Christus sumitur, Hoc firmissimè credo milesulideo solum; quia tu dixisti, & quidem certius, quā si oculis viderem; gaudeòque, quòd sic captivando intellectum meū tibi obsequium aliquod præstare possim; cupiens in veritate annumerari Beatis illis, qui non viderunt, & crediderunt.


Recolitur memoria Passionis ejus in ultima cæna nobis specialiter commendata. Proinde oblatū

blatum missæ sacrificium velim
esse Eucharisticū, summas tibi
gratias agens mi JESU! pro
sudore sanguineo, & tristitia
usque ad mortē, pro vinculis,
& catenis, alapis, & sputis, fla-
gellis, & spinis, pro bajulatio-
ne crucis, crucifixione, & mor-
te tua amore nostri susceptis.
Hoc insuper dabis mihi: ut in
amore tui reciproco vivā &
moriar.

Mens impletur gratiâ. Ecce
mi JESU! vasa animæ meæ in-
tellectum, memoriā, & volun-
tatē meam tibi offero: ut à te
mundentur magis & aptentur
ad recipiendum pretiosa dona
illa

illa, quæ nobis tuo Sangvine comparasti. Imprimis autē pecto: ut memoria mea continuò excitetur svavi recordatione præsentia tuæ, intellectus prudentiâ justorum instruatur, voluntas verò piis semper affectibus in finē suum ultimū feratur.

Et futura nobis gloriæ pignus datur secundum promissionem tuā Ioan.6. Qui manducat hunc panem, vivet in æternum. Cū igitur toties pignus illud sacrosanctū acceperim, quidni sperē vitæ æternæ me fore participē imò confido; modò hæc data mihi fuerit gratia, quā enixè pecto: ut prius sacro hoc pignore
ite-



iterum instructus ex hac vita
discedam.

PATER NOSTER.

Pater de cælis Deus! offero
tibi Filium tuū unigenitum
in quo tibi benè complacuit, ut
per ipsum perfectissimè sanctifi-
cetur nomen tuū. Per ejusdem
Filii tui virtutes, specialiter di-
vinas tuas perfectiones laudari
desidero; scilicet per actus reli-
gionis, præcipuè, adorationis
majestati tuā, obedientiæ, do-
miniū tuum, amoris, bonitati
tuam, gratitudinis, beneficentiā
tuā, patientiæ, justitiam tuam,
mansuetudinis, clementiā, &
benignitatē tuā, humilitatis, in
fini-

finitam sublimitatē tuam &c. ut per hos, aliosque perfectissimos virtutū actus omnis noster defectus, & negligentia in sanctificatione nominis tui commissa suppleatur.

Adveniat tecū pariter mi Jesu! in cor meum regnum gratiæ tuæ, quæ rationem meā legi tuæ, rationi vero passionēs, & appetitus meos subiiciat: ut non dominetur mei omnis iniustitia; sed potius in me sit, & semper maneat regnū Dei, hoc est iustitia, & pax, & gaudium in Spiritu sancto. Fiat voluntas tua ô Christe! Proinde per actū sacrificium offero in memoriā
tui,

tui, ut iussisti, simulque dona gratiā: quā voluntatē tuā in terra, sicut Beati in cœlo since-rè, alacriter, & cōstanter implere possim.

Gratias tibi ago Domine Jesu !
Pro pane quotidiano, imprimis verò supersubstantiali cibo, & potu corporis, & sanguinis tui; & precor: ut, quos effectus panis in corpore, similes caro, & sanguis tuus operetur in spiritu: ut scilicet vitā, spiritualē animæ meæ conservet, augeat, & corroboret; ut sapiat mihi observantia legis tuæ, & cū gustu à me fiant, quæ sunt ad tuam gloriam, & salutem meam.

Pro meis & hostiū meorum
de-

debitis offero tibi ô cælestis Pater merita Filii tui infinita, quæ non potest non acceptare, modo nullus sit obex, quod fatalis foret, & hunc per eadẽ merita removeri flagito: ut ego, & omnes inimici mei, quos ex animo propter te diligo, tibi perfectè reconciliemur.

Tu nôsti Domine quàm infirma sit caro mea, imò & spiritus.

Robur utriusque, & munimen sit Sacramentum, quod sumpsi. In ejusdem Sacramenti virtute instanter peto, ut carnem mortificationis spiritu, mundũ contemptus, dæmonẽ vivâ in Deũ fide valeam superare.

Spe-

Spero mi Jesu! cū modò mihi præsens sis, fore: ut liberares me ab iis saltē malis temporalibus, quæ prævides salutī meæ obfutura, præsertim verò libera me à malo, sive gravi peccato.

Da mori prius, quàm in illud incidere. Denique ne separer à te sine meo ultimo, libera me à malo damnationis perpetuæ: quia cum Sanctis tuis te in æternum laudare desidero.

ORATIO

Petens à Christo 7. opera misericordiæ.

Domine Jesu Christe! qui esurientes reple bonis, & divites dimittis inanes, excita in
me

me semper desiderium tui: hoc ipsum enim pascit me; & pane illo vivo, qui de cælo descendit refice spiritum meū: ut in fortitudine cibi illius ambulē usq; ad montem Dei Sion.

D. J. C. Fons patens domui David & habitantibus Jerusale in ablutionem peccatoris. Anima mea, quasi terra deserta, in via, & in aquosa. Riga eam fluentis gratiarum tuarum: ut in me fiant incrementa frugum justitiæ, & æstus concupiscentiæ meæ temperetur.

D. I. C. Captivorum Redemptor, gratias tibi ago, quod in ergastulum cordis mei ingressus sis,

sis, libera spiritū meum captivū
à lege peccati, solve vincula de-
lictorum meorū, & in libertatē
filiorum tuorū affere me.

D. I. C. Pauperum solamen
miser ego sum, & miserabilis,
pauper, cæcus & nudus, misere-
re mei obsecro! indue me vesti-
mento salutis & indumento ju-
stitiæ circumda me nè veste nu-
ptiali carens mittar in tenebras
exteriores.

D. J. C. Archiater optime
gaudeo, quod ad me ægrū ve-
neris. Exeat quæso! virtus de te
quæ sanet omnes infirmitates
meas, & talē mihi vigorē spi-
ritus

N

ritus conferat, ut à morte æterna præservet.

D. I. C. Quæ hæc bonitas tua ut me visites in loco peregrinationis meæ? Custodi me ut pupillâ oculi, sub umbra alarû tuarû protege me ab inimicis. Dirige in conspectu tuo viam meâ; ne à cælesti patria aberrê.

D. J. C. Resurrectio, & vita nostra! da, ut peccatis mortuus in sanctitate & justitiâ vivam Deo; & sepultis in morte & passione tua delictis meis in novissimo die merear in æternâ vitâ resuscitari.

ORATIO

Ad B. V. Mariam.

Sicut oculi ancillæ in manibus
Do



Dominae suæ, ita oculi nostri
ad te. ô Beatissima Virgo Maria
ut pro nobis anima tua magni-
ficet Filiū tuū, eidemque gratias
agat pro beneficio cōmunionis.
Eam insuper nobis gratiā exora
ut tecū spiritus noster in Deo
salutari suo mereatur exultare.

FESTIS APOSTOLORUM.

Cum S. Petro adoro te mi
Jesu! Principē pastorū, &
Episcopum animarū nostrarū,
corde, & ore confiteor: Tu es
Christus Filius Dei vivi. Sim
quæso! & manea semper inter
oves pascuæ tuæ.

Cum S. Paulo flecto genua
mea non solū ad Patrē D.N.I.C

N2

sed

sed etiam ad te Iesum Christum
Filiū ejus naturalem, & gratias
tibi ago pro dato Spiritu adopti-
onis Filiorū Dei, in quo clama-
mus Abba Pater. Hoc tantum
rogo; ut hæredes Dei, & tui co-
hæredes fiamus.

Cum S. Ioanne adoro te mi
Iesu! legislatorem suavissimū,
diffunde quæso charitatē Dei, &
proximi per Spiritum S. in cor-
dibus nostris: ut, sicut tu unus es
cum Patre, ita omnium nostrum
sit cor unum, & anima una.

Cum S. Iacobo adoro te mi
Iesu sedentē ad dexterā Patris
tui, & cum eodē Discipulo tuo
à dextris tuis sedere desidero.

Si

Si vis, ut calicē tecū bibam, da,
ut velim, & possim, & hoc ipsū
rogo te per calicē Sangvinis tui:
ut de fructu illius particeps fa-
ctus introire aliquando merear
cum illis in regnū tuū, quibus
paratū est à Patre tuo.

Cum S. Andrea adoro te mi
Iesu! amatoriē crucis mirabilē.
Vis exempli tui, & auxiliū gra-
tiæ tuæ faciat mihi jugū tuum
svave, & onus leve: ut sciā in pa-
tientia possidere animā meā

Cum S. Thoma adoro te mi
Iesu authorē, & consummato-
rem fidei nostræ. Dominus De-
us meus, & Deus meus? adauge
nobis fidem, & talē quidē, quæ

per charitatē in nobis operetur.

Cum S. Philippo adoro te mi JESU! substantialem æterni Patris imaginem. Ostende nobis Patrem, & sufficit nobis. Eū in finem peto: ut semper beneficio communionis fiamus Filii Patris tui magis accepti, & hæreditatis cæli obtinendæ magis secuti.

Cum S! Bartholomæo adoro te mi JESU! regem regū, & dominum dominantium. Volo! ut tu solus regnes in medio cordis mei. Iuva me, ut quidquid in me contrariatur legi tuæ subjungetur.

Cum S. Mathæo adoro te
mi IE-

mi IESU medicum animarū nostrarū, & gratias tibi ago; quod mihi non conviva ut Mathæo, sed convivium factus sis & medicina. Ecce quem amas, infirmatur. Sana me Domine, & sanabor; dic animæ meæ, salus tua ego sum, salvum me fac, & salvus ero.

Cum S. Jacobo adoro te mi JESU! Dominum & Magistrū nostrum, totum me dominio, & magisterio tuo subiiciens. Servus tuus sum ego, utinā bonus & fidelis. Etiam discipulus tuus esse desidero; sed mitis & humilis corde: ut veram animæ requiem inveniam.

N4

Cum

Cum S. Juda Thadaeo adoro te mi JESU! ducem militiae nostrae. Nostra fides in te, victoria nostra est. Da igitur mihi scutum fidei, gladium spiritus, galeam salutis, & loricam justitiae: ut certem tanquam bonus miles Christi, ut coronam reportem gloriae.

Cum S. Simone adoro te mi JESU! qui nobis à Deo constitutus es Judex vivorum & mortuorum. Munda cor meum in sanguine tuo & meritis tuis exorna, dū communico, ne te in judicium & condemnationem accipiam. Excita, urge & juva spiritum meum: ut cum electis
tuis

tuis ovibus vocem tuam audiā,
& ab auditione mala non ti-
mebo.

Cum S. Mathia adoro te mi
Iesu! alpha & omega, princi-
pium & finem salutis meæ. O
si illum aliquando attingerem.
In te sunt Deus vota mea: &
quia timeo, ne alius accipiat co-
ronam meam, gratiam peto ef-
ficacem: quâ per bona opera
vocationem meâ certam faciā,
atq; consummē.

A L P H A B E T U M

EX SCRIPTURA.

Psal. 71. Abundantia Pacis v.7.

Flat pax in virtute tua mi Ie-
su! & abundantia gratiarū tu-
arum tecum veniat, ita se dif-
fun-

fundens per totum cor meum:
ut in eodem nullus in posterum
mundo, carni & diabolo locus
esse possit.

Jerem. 13. Brachiū Domini.

vers. 1.

TU nosti Pater S. quam debi-
les servi simus. Esto brachi-
um nostrum, dum visitas nos in
salutari tuo. Virtus quidē in in-
firmitate perficitur, sed infirmi-
tas mea tuā virtute roboratur.
Confirma ô Deus! quod ope-
ratus es in nobis fidem, spē &
charitatem; ut maneant in no-
bis tria hæc, major autē horū
charitas nunquam excidat.

Lucæ. 1. Cornu salutis v. 69.

Gaude

GAude mi Iesu decus & robur meum de erecto nobis cornu salutis in Venerabili Sacramento. Tu mihi dilectus es, quemadmodum filius unicorū decorem indutus, & fortitudinem. Virtute & gratiā tuā mihi opus est. Utrāque quasi diploide induar, per te ô Jesu! ut ego sim, & maneam dilectus tuus.

Ioan. 4. Donum Dei. v 10.

OQuale donum! ubi donator ipse venit in donum. Gratiās tibi ago ô Jesu! quia dare præstantius non potuisti. Quid retribuam tibi si cor meum desideres immundum, & vacuum,
habe

habe illud; sed sic repurga, renova & exorna: ut libenter illud inhabites.

Proverb. 17. Expectatio præstolantis. v. 8.

QUæ expectatio mea nonne Dominus ōne ac sūmū, bonū quod me solū potest satiare. Libera quæso Domine! à vanis concupiscentiis spiritum meū: ut in te Deo, unico salutari meo, quod in silentio, & spe præstolabor, quiescat.

Zachar. 5. Frumentum Electorum v. 17.

VÆ mihi! si de electis tuis nō fuero mi Jesu! cum electo electus eris, & volentem salvari non

ri non deferres. In spē firmā erigit me eloquium tuum, quo promittis vitam æternā manducantibus te. Scio, cui credidi, & certus sum. Modò ex parte mea non deficiam. Proinde, cum Eucharistia sit panis cor. hominis confirmans, illa stabiliri cor meum peto, & in gratia confirmari.

Isaia 5. Germen justitiæ. v. 23.

Benedicta sit in æternū patientia tua mi Deus! quòd me oleastrum inutilem usque huc terrā occupare permiseris. Peto humiliter: ut, dum per communionem tibi olivæ cœlesti inferior, tantum virtutis, & gratiæ attraham, tamq; firmiter tibi per
amo-

amorem infertus maneam; ut
me nihil à te possit separare.

Levit. 3. Hostia Pacificorū v. 1.

IN Sacrificium propitiatorium
offero tibi ô coelestis Pater!
Filiū tuum: ut tibi perfectè per
plenam omnium culparum, &
pœnarum remissionem recon-
ciliemur; ut verò tibi reconcili-
ati maneamus, largire nobis cor
bonum, & pacificum: ut simus
invicem solliciti servare unitatē
spiritus in vinculo pacis,

Iosue 15. Irrigum superius v. 19,

Deficit spiritus noster ô Jesu!
quasi palmes arescens, nec
juvare se potest; nisi irriguo cœ-
lesti influxeris. Penetret quæso
vividus

vivus, & efficax succus gratiæ
tuæ omnes vires & potentias a-
nimæ nostræ: ut eamus, & fru-
ctum afferamus, & fructus no-
ster maneat.

Ioan. c. 5. Lucerna ardens. v. 35.

IN simplicitate cordis solâ fide
impulsus accedo ad te mi IESU
& adoro lumen infinitum Di-
vinitatis tuæ sub specie panis ab-
sconditum. In me fateor parū
lucis est, minus ardoris. Tu ô
IESU! si vis juvare me potes. Fac
igitur: ut in me lumen fidei sē-
per ardeat, & amoris ardor ad
proximi ædificationem semper
luceat.

Ecclē-

Ecclesiastici 6. Medicamentum
vitæ. v. 16.

Non solum propter necessi-
tatem honoro te ô Iesu! me-
dicum infirmitatis meæ; sed eti-
am ex toto corde diligo propter
excellentiam medicinæ, quam
nobis ex carne, & sanguine tuo
præparasti. Virtute hujus medi-
cinæ fretus, me certo certius à
morte æterna præservandū spe-
ro. Hoc germen spei meæ ita
gratijs tuis irrorat: ut fructū pro-
ferat vitæ æternæ.

Proverb. 31. Navis institutoris.
v. 14.

TU ô Christe! navis es saluti-
fera de longè, hoc est, de
cælo

coelo portans panē, quo necesse
est refici animam meam. Panis
ille suâ virtute ita afficiat, &
convertat me ut in te, de te, &
propter te vivens salutis portū
attingam.

Ioan. c. 10. Ostium ovium. v. 7.

QUAM bonus pastores ovium
Ô JESU! quamvis amore tuo
indignus sim, peto nihilominus
in corporari gregi tuo: ut per
te ingrediar, & egrediar, & pa-
scua inveniam; quibus ita im-
pingvetur, & roboretur spiritus
meus; ut te pastorem meū con-
stanter sequi possim, & introire
aliquando in gaudium Domini.

O

Cant.

*Cant. c. 4. Peteus aquarum
viventium. v. 15.*

DOleo mi JESU! & veniam à
te suppliciter rogo, quod a-
nimam meam vivam tui imagi-
nem toties peccando maculave-
rim. Me totū immergo in pu-
teum aquarum viventium: Et
quia aquæ tuæ ô JESU? puræ
sunt, per illas peto ab omni im-
munditia purgari. Quia medi-
cinales: à futuris noxis præser-
vari. Quia dulces: experiri præ-
gustum aliquem illius dulcedi-
nis, quam abscondisti timentibus te.

*Epist. 2. ad Thim. 6. Quæstus
magnus v. 6.*

Ma-

Magnus quæstus JESUM pos-
 fidere. Quid prodest mihi
 lucrum universi, si Jesum non
 habeam? malo tecum ô Iesu es-
 se in inferno, quàm sine te in
 paradiso. Et ideo omnia detri-
 mentum facere paratus sum: ut
 te JESUM meum lucrificiã: cum
 sis thesaurus cordis mei pretio-
 sissimus. Ubi verò thesaurus me-
 us, ibi & cor meum erit.

Of. c. 13. Ros matutinus v. 3.

Fluat ut ros eloquium tuũ ô
 Christe! & noxium germen
 intellectus, & voluntatis meæ
 quam primum extinguat; bonas
 vero cogitationes sacro, & sua-
 vi illapsu suo foveat, & pios af-

fectus nutriat. Imprimis tamē
 Ô Iesu! matutino tempore peto
 imbui animam meam gratioſo
 rore tuo, ut illius efficaciâ per
 totum diem ſentiens magis ſē-
 per in bono proficiam.

Numer. c. 7. Simila conſper-
 ſa oleo. v. 13.

Non ſimilam tibi Ô cœleſtis
 Pater! ſed puriſſimam hu-
 manitatem Domini N. J. C. tibi
 offerro, oleo Divinitatis deli-
 batam; ut in ea tibi ſingulariter
 complaceas, & pro mea in te
 laudando, & amando negligen-
 tia ſupplementum habeas. O ſi
 cor meum inſtar ſimilæ purum
 foret, amoris tui oleo conſper-
 ſum

sum! Cor mundum crea in me
Deus, & spiritum rectum amo-
ris tui in nova in visceribus meis.

Exod. 35. Thymiama odoris
suavissimi. v. 26.

A Scendat oratio nostra Pater
S. sicut incensum in conspe-
ctu tuo per Dominum N. I. C.
Odor ejusdem suavissimus con-
sumat, quidquid foetoris ex par-
te nostra immixtū est, ut Chri-
sti Filij tui bonus odor simus: &
ut odor ille tibi cedat ad gloriā
proximo ad ædificationem, no-
bis verò singulis ad salutem, &
vitam æternam.

Zachar. c 5. Vinum germi-
nans Virgines. v. 17.

O₃

Nosti



NOsti Domine Iesu! quibus
nos periculis involvat car-
nis concupiscentia. Caro tua sa-
cro sancta carnem nostram mū-
dificet. Sangvis tuus immacula-
tus pravos æstus sanguinis no-
stri sedet, & extinguat. Spiritus
tuus Divinus ita animas nostras
possideat: ut tibi casto corpore
serviamus & mundo corde pla-
ceamus.

GRATIARUM ACTIO

PER

ANGELOS ET SANCTOS.

IN conspectu Angelorum psal-
lam tibi Deus meus, & con-
fitebor tibi Domine in toto cor-
de meo, in concilio Justorum,
& con-

& congregatione. Magnificate
 Dominum mecū, & exaltemus
 nomen ejus in idipsum. Bene-
 dicite omnes Seraphini Domi-
 no, pro tanta charitate laudate,
 & superexaltate Deū Salvatorē
 meum. Benedicite omnes Che-
 rubini Domino, pro tanta cha-
 ritate laudate &c. *repetuntur*
prima & ultima eadem verba,
 Benedicite omnes Throni Do-
 mino &c. Omnes Dominatio-
 nes, omnes Virtutes, omnes Po-
 testates, omnes Principatus, o-
 mnes Archangeli, omnes Ange-
 li, omnes SS. Patriarchæ &
 Prophetæ, omnes SS. Apostoli,
 & Evangelistæ, omnes SS. Mar-

tyres & Confessores, omnes SS.
 Monachi, & Eremitæ. omnes
 SS. Virgines & Viduæ. Bene-
 dicite omnes Sancti & Sanctæ
 Dei Domino; pro tanta chari-
 tate laudate, & superexaltate
 Deum Salvatorem meum, cui
 cum Patre & S. Spiritu sit honor
 & gloria in sæcula sæculorū. A.

DUODECIM

FRUCTUS SPIRITUS

Ad Galatas c. 5. v. 22. & v. 23.

CHARITAS.

Ignis.

Ignem venisti ô Iesu in terrā
 mittere, & quid vis? nisi ut ac-
 cendatur: Ecce spiritus meus
 friget, sicut uter in pruina. Con-
 sume

sume in eo, quidquid est amoris proprii: ut in ara cordis mei semper purus ignis amoris tui ardeat; & hunc ignem suavitatis tuæ oleo in me constanter fove! ut in amore tui vivam, & moriar.

GAUDIUM.

Corona.

O Iesu! gaudium meum, & corona mea, in te exultare debet spiritus meus; cū sis consummatio omnis gratiæ, virtutis, & gloriæ. Justifica indies magis. & lætifica animam servi tui, corona me in misericordia & miserationibus tuis: ut sim bonus, & fidelis servus tuus, & audi;

audire aliquando à te merear:
intra in gaudium Domini tui.

P A X

Iris.

Summas tibi gratias ago mi
Iesu! quod nos æterno Patri
reconciliaris in sanguine tuo,
in cujus effusione quasi nube ro
scida misericordia & veritas
obviaverunt sibi, iustitia & pax
osculatæ sunt & iridem recon
ciliationis pulcherrimam nobis
fecerunt, Doleo, quòd pacem
tam carò emptam pro merito
non coluerim. Veniam suppli
citer rogo, & gratiam: ut quā
tum in me est, studeam pacem
habere ad omnes, & cū omni
bus

bus æterna tandē pace fruar. A.

PATIENTIA.

Palma.

Liceat mihi ô IESU ascendere
in palmam crucis tuæ, & ap-
prehendere fructum patientiæ
tuæ, illa enim mihi summope-
re necessaria est. Quærunt me
supprimere hostes mei; sed ut
palma florere desidero, & in vir-
tute tua altiùs affurgere. O cœ-
lestis Pater! fit in me gratia Fi-
lij tui victrix passionum mearū,
& hæc victoria mihi ad salutē,
tibi ad gloriā cedat sempiternā.

BENIGNITAS.

Mamilla.

CVM parvulis in simplicitate
cordis mei adoro mi IESU!

benignitatem tuam quasi mamillam pectoris tui. Fluat ex illa purissimū lac doctrinæ tuæ in intellectum nostrum, & dulcedo amoris tui in voluntatem nostram ut non pueri sensu; sed malitia parvuli fiamus, cū proximo benignè semper, & sincere conversemur in terris, tuā verò benignitate æternum gaudeamus in cælis.

BONITAS.

Fons.

Benedicta sit in æternum liberalitas tua ô Iesu non enim solum bona spiritus sancti; sed ipsam bonitatē, non aquas tantū salutare, sed ipsum fontē donasti

nasti nobis. Doleo, quòd tam ingtatus tibi fuerim usq; huc, ut fluxū gratiarum tuarū toties impediverim. Dilata cor meū, & omnes sinus ejus occupet bonitas tua, ut in eo nullus malitiæ locus esse possit.

LONGANIMITAS.

Anchora.

QVam beatus homo, qui sperat in te Iesu bone! adjutor meus & consolator meus esto, dū prolongatur desiderium meū, sis quæso protector meus, ne tempestas demergat me cū salutis naufragio. In adversis quibuscunq; fides mea te velut Cynosurā cursūs mei constanter respici-



spiciat, spes mea sēper in te fixa
 maneat velut anchora animæ
 meæ firma ac tuta, charitas ve-
 rò Dei velut aspirans flamen S.
 Spiritus me in portum salutis æ-
 ternæ deducat.

MANSVETVDO.

Columba.

IGnosce infirmitati meæ Do-
 mine Iesu! quòd tā facilis sim
 ad iram, & impatientiā. Velle
 quidē adjacet; sed perficere nō
 invenio. Da mihi spiritū mitē
 & placidū. Utinam sicut colū-
 ba foret unima mea sine felle.
 Spiritus tuus mi Iesu! super mel
 dulcis tā suaviter cor meū affi-
 ciat: ut nullā injuriā amareseat.

F I-

F I D E S,

Scutum.

Salvator mundi! gaudeo te esse ducē militiæ nostræ, jurato fidelitatē tibi promitto; sub vexillo nominis tui volo vivere & mori. Tu interim provide mihi de armis spiritualibus: ut militem bonā militiā: imprimis verò in omnibus sumā scutū fidei: ut possim tela nequissimi ignea extingvere.

MODESTIA.

Flumen.

Credo, mi cœlestis Pater: te ubiq; præsentē esse: in te ipso enim vivimus movemur & sumus, & quòd unquā in conspectu tuo

ctu tuo malè egerim, doleo. Obsecro igitur te per modestiã Filij tui: ut sicut flumen placidè intra suum alveum, ita omnes actiones & sermones mei ad tuam gloriam & proximi ritè, graviter, & modestè sèper procedant.

CONTINENTIA.

Cythara.

ADoro mi Deus! & glorifico providentiam tuam, cujus beneficio hucusq; cibus & potus mihi non defuit. Concede moderatũ utriusq; usũ, & confitebor tibi in cythara Deus, Deus meus. Doleo Harmoniam
lau-

laudis tuæ unquā intemperantiā turbatam esse. Dona mihi gratiā: ut sobriè, semper piè, & justè vivendo laudes tuas aliquando cū Sanctis tuis in cœlesti convivio æternum merear decantare.

CASTITAS.

Lilium Convallium.

NULLIBI sic floret Domine Jesu Castitatis lilium, quàm in cordibus humilium, & idèd humilis esse cupio, & parvulus in oculis meis: ut in corpore & anima mea illibatum germen Castimoniæ semper floreat. Pro
inde

P

inde etiam tibi supplico ò Spiritus S. Deus! ut hoc ipsum germen irriguo coelesti à nimio æstu, & alia quavis labe digneris custodire.

FINIS.



iri-
ger-
o a-
e-



906452 Bibliotheca 450,-
P.P. Camaldulensium in Bielany

Depozyt w Bibliotece Jagiellońskiej



03328

O.V. 25

